

ወዚር ካርጅየት ኤረትሮፕ እት ኩዌት ዝያረት ወዲ

ዲብ ደውለት ክዌት ዝያረት ረሰምየት ወዲ ለህለ ወዚር ካርጅየት ኤረትሮፕ ኣሰይድ ዑሳማን ሳልሕ፡ ምስል ናይብ ርኢሰ ውዘረኡ ወወዚር ካርጅየትል ደውለት ሼክ ሰበሕ ኣልካልድ እንዴ ትዋጀህ ህድግ ምስሉ።

ዲብ ዮም 10 ኖቨምበር ዲብ ክዌት ለገብኦ ልቀኡ፡ ወዚር ዑሳማን ወሼክ ሰበሕ፡ ዲብ ኣደቀቦት ዕላቀት ክልኢኦን ድወል፡ ናይ መንጠቀት ወእዲን ተጠውራት፡ ክምስልሁመ ናይ ሕበር ኣህምየት ለቦም ብዕድ ቅደይ ህድገው።

ዲብላ መዋጀህት፡ እብ ጀህት ኤረትሮፕ ሽኡን ተንፈዚ ሰፋረት ኤረትሮፕ ዲብ ደውለት ክዌት ኣሰይድ

ሐመድ ዮሐንስ ሓሊ፡ እብ ጀህት ክዌት ህዩ፡ ናይብ ወዚር ካርጅየት ካልድ ኣልጀራሊ፡ ሴድያይ ወዚር ካርጅየት ዶክተር ኣሕመድ ናሰር ኣልመሐመድ ኣልሰበሕ ውብዕዳም ሓድራም ዐለው።

እሊ ክእነ እት እንቲ፡ ወዚር ካርጅየት ኣሰይድ ዑሳማን ሳልሕ፡ ዲብ ዮም 9 ኖቨምበር እግል ኤረትሮፕን ሰነን ደውለት ኩዌት፡ ዲብ ሓድረት ሓላት ወጠን፡ ግረ እትፋቅየት ሰላም ወዕላቀት ኤረትሮፕ ወኣቶብዩ ዲብ መንጠቀት ቀር ኣፍሪቀ ለትረኡ ሽማል ሰላም ወመሰከብት፡ ክምስልሁመ ሕኩመት ኤረትሮፕ እትብግስቲ ለህሌት እግል መዋጥኒን ኣውለውየት ለለህይብ ኣብነት እስትሰማር ለረከዘ

ሰሚናር ወደ።

ወዚር ዑሳማን ዲብ ደንጎበ ሸዑብ ወሕኩመት ኤረትሮፕ፡ እግል ክሉ ዐዳዋት ወዋይዲሳት እንዴ ካፍሐው ወኣፍሽለው ዲብ መርሐለት ሐዳስ ኣትያም ክምስል ህለው፡ እብ ለትፈናተ መትኣታይ ሕምሩግ እት ዐለ ቀር ኣፍሪቀ፡ ልትረኡ ለህለ ኣህታይ ተጠውራት ህዩ ሰእየት ለለህይብ ክምቲ እንዴ ሸርሐ፡ ዲብ እሊ ሕኩመ ኤረትሮፕ ዐባዩ በራምጅ ዐማር እትብግስት እቲ ለህሌት ወክድ፡ ምዋጥኒን ክሉቀ ለህለ ኣብነት እስትሰማር እብ ብሕተ ልግበእ ወእብ ሐሸም እብ ዋጅብ እግል ልትጎፊያ እብ ኣትፋቀደ።



ገበይ ዐዲ-ጓዕዳድ ኣቅርዶት ኣወላይ መርሐለት ሸቅለ ለኣነብት



ኣወላይት መርሐለት ሸቅየት ናይለ ምን ዐዲጓዕዳድ ኣሰክ ኣቁርዶት ለትትመደድ፡ ዱቅሪ እግል ኣቃሊም ምግብ ወጋሽበርክ ለትጨምር 134 ኪሎ ምትር ለሪመ በዐል ክልኦት ከዋቅዋራን ጽርግዩ፡ ዮም 11



ኖቨምበር ምን ገጽ ኣሰበሕ እት ሐበለ እት ገብኣት ዓደት እፍትታሕ ኣሰተብዱ።

እለ እብ ሸርከት ቻይና 'ሰፊኮ' (SFECO) እት ክልኡ ሰነት እግል ትትመም መስኢት ለገብእ ዲብ ኣወላይት መርሐለትል ጽርግዩ፡

ምን ሐበለ ኣሰክ ጨዳታት 30 ኪሎ ሜተር ትገብእ።

እተ መስኡል ሸኡን እቅትሳድ ጀብህት ሸዕብየት እግል ዲሞቅራዊየት ወዐዳለት ኣሰይድ ሐጎስ ገብራሂወት ለሐድረ ዲብ መናሰበት፡ ከሊመት ለኣስመዐ

ወዚር ብነ ኣሰይድ ኣብረህ ኣሰይድ፡ ቀደም እለ ምን ኣሰመረ ከረን ለትኣቲ ወሐቀህ ጋሽበርክ ለትደንን ጽርግዩ ጸባብ ወእብርት ሰበት ዐለት እት ሐረከት መካይን መታክል ጋብኣት ክም ዐለት እት ለሐብር፡ እለ ኣዜ ተኣነብት ለህሌት ጽርግዩ ጥውር፡ ለዐለ መታክል እት ባልሐት ሌጠ እንዴ ኢትገብእ፡ ለኣሰክ ኣቁርዶት ዐለት መሳፈት እብ ናይ 20 ኪሎምትር ለትኣቀርቡ፡ እስትራተጅያይ ከዋ ክምስል ቲ ሸርሐ።


ሰፊር ጅምሁርየት ሸዑብ ቻይና እት ኤረትሮፕ ሚስተር ያንግ ዚጋንግ ህዩ፡ ሸቅየት ብንዩት ትሕትየት ጽርግያታት ዎሮት ምን ቻይና ብግስተ ለህሌት በዳሪት “ሐቲ ክሉሊት-ሐቲ ገበይ” ክም ተ እት ወዲሕ፡ እሊ ኣሸቃል እሊ እግል ተኣትሻፍግ ኮንትራት ናሰኣት ለህሌት

ሸርከት “ሰፊኮ”፡ ተጃርብ ርሐብ ወመቅደረት ሰበት ቡ፡ እግል ምስለ ለሸቁ ኤረትሮፕን ሰብ መቅደረት ተጃርብ እግል ትኣፍል ሰእየት ክም ገብእ ዲብ ኣፍህመ።

ምን ውሳኔት ብነ መሆንድስ ሳምሶም ተሰፋይ እግል ኤሪና ዲብ ሀበዩ ሐብሬ፡ እለ ምን ጠፋሐት በሐር 2060 ምትር እንዴ ቀንጸት ኣሰክ 910 ምትር ለትትከሬ 134 ኪሎምትር ጽርግዩ ቅዋራን፡ 10 ቢንቶ ክም ትሸምሉ ወደረ።

መመቅራኢይ ሸቅል ኩዋጥ “ሰፊኮ” ሚስተር ቼን ዩ እብ ጀህቲ፡ እንቡተት ኣወላይት መርሐለት ናይለ ሸቅል፡ እግል ሐሰያት ወሕሸኩብ መባትክ ምድር ለትኣትቃልል ክምስል ተ እት ለሐብር፡ ብንዩት ናይ 140 ምትር ርሕብ ለቡ ኩብሬ ክም ብዲባመ ኣትኣመረ።

ከበር እስትሸሃድ



ግዲም ምናድል መሐመድ ኣድም ኣሕመድ (ሸግራይ) እበ ሳደፈዩ ሕማም ዲብ ቀበት ዐድ ወካርጅ ልትዓለጅ ሐቆለ ዐላ፡ ዮም 9 ኖቨምበር 2019 እት 67 ሰነት ምን ዕምሩ ኣሰተሸህደ።

ዲብ ወሬሕ ዲሰምበር 1968 ዲብ ጀብህት ተሕሪር ኤረትሮፕ ለፈግረ ወዲብ ሰነት 1970 ዲብ ቅዋት ሸዕብየት ተሕሪር ኤረትሮፕ ለተሓበረ ገዲም ምናድል መሐመድ ኣድም፡ ኣሰክ ኣምዕል ሕርየት ዲብ ለትፈናተ ወሕዳት ጃሸ ምን ዓዲ ምናድል ኣሰክ ቃእድ ክፈል ጃሸ፡ ሐቆ ሕርየት ህዩ ኣሰክ 1994 ምን ወዛረት ድፈዕ ዲብ ውዛረት ሕኩማት ኣቃሊም ሐቆለ ትቀየረ፡ ዲብ እዳራት ኣቃሊም ጋሽ በርክ ወቅብለት በሐር ቀየሕ እግል ሸዕቡ ወወጠኩ እብ መትሰባል ለከድመ ምሕርባይ ቲ።

ገዲም ምናድል መሐመድ ኣድም ኣሕመድ ኣብ ሰለሰ ውላድ ቲ።

ዓደት ቀብሩ ህዩ ዮም 10 ኖቨምበር ሳዕት 4:00 ኣልዐሰር ዲብ መቅበረት ሹህደ ኣሰመረ ገኣት።

ውዛረት ሕኩማት ኣቃሊም እብ እስትሸሃድ ገዲም ምናድል መሐመድ ኣድም ኣሕመድ (ሸግራይ) ለትሰመዐተ ሐዘን መሪር እግል ዓይለቲ መሻቂቲ ወመልሂቲ ኤማን ትተምኡ።

መናድል ገዲም ሌ/ኮሎኔል ገብረ ሃይለማርያም፡ እብ ሕማም ዲብ ቀበት ዐድ ወካርጅ ሰዳይት ሕክምን ትገብእ እግሉ እንዴ ዐለት፡ ዮም 10 ኖቨምበር ዲብ 74 ሰነት ዕምሩ ኣሰተሸህደ።

ዲብ ወሬሕ ኣብሪል 1975 ዲብ ቅዋት ሸዕብየት ተሕሪር ኤረትሮፕ ለሻረክ ሌተናል ኮሎኔል ገብራ፡ ዲብ ለትፈናተ ውሕዳት ዲሸ-ሐርብ ወእዳረት ኣጅሀዘት፡ ምን ዓዲ ጅንዲ ኣሰክ ደረጀት ሌተናል ኮሎኔል፡ እግል ሸዕቡ ወዐዱ እብ መትሰባል ለከድመ ምሕርባይ ቲ።

ሌተናል ኮሎኔል ገብራ ህይሌማርያም፡ በዐል ፈረሶ ወኣብ 3 ውላድ ቲ።

ዓደት ቀብር ምናድል ሌተናል ኮሎኔል ገብራ ህይሌማርያም፡ ማሌ ሰር ኣምዕል ዲብ መቅበረት ሹህደ-ኣሰመረ ገኣት።

ውዛረት ድፈዕ - ህይኣት ሉጂስቲክ ወመሳሪፍ፡ እብ እስትሸሃድ መናድል ገዲም ሌተናል ኮሎኔል ገብራ ህይሌማርያም ለትሰመዐዩ መሪር ሐዘን ዲብ ትሸራሕ፡ እግል ዐዳ፡ መልህያም ንዓሉ ወፊተቹ፡ ኤማን ለሀበኩም ትብል።



መውሉድ አልነበዋ አልሸሪፍ እብ ነያረት ተዐዩደ

ዲድ መውሉድ አልነበዋ አሸሪፍ ናይ ሰነት 1441 ሂጅርያ፡ ዮም 9 ኖቨምበር 2019 ዲብ ክለ ወጠን እብ ነያረት ተዐዩደ።

ዲብ መዲነት አሰመረ፡ ምን ሳዐት 7 እስቡሕ ዲብ ሚዳን ጃምዕ አልኹሳፊኦ አራሽዲን ዲብላ ገኣት ዓደት፡ ውቁላም ሰብ ሰልጠት ሕክመት፡ ዲብ ኤረትርያ ለመርከዞም ሱፈረኦ ወዲብሎማሰዩን፡ ሚርሐት ደዳነት ክስታን፡ ክምሰልሁመ መእምኒን እሰላም ለሐድረው እተ ዓደት ዲድ፡ ርኢሰ ሙእተመር አውቃፍ መዲነት አሰመረ አሰይድ መሐመድሰዲድ በሸር፡ ዲብ ታሪክ መውሉድ አልነበዋ ዲብ እዲነ ለአምጸአዩ ፍቲ ሕድ ወሕውትነት ለረከዘ ሸሪሕ ቀደመ።

መመቅረሓይ ሸቅል ሙፍቲ ኤረትርያ ወአሚን ዓም ለዓሊት ሀይሐት ኢፍተኦ ወሸኡን እሰላምዩ ኤረትርያ ፈዲሲት ሼክ ሳልም

ኢብራሂም አልሙክታር እብ ጀሁቲ፡ እግለ መናሰበት ለከሰስ ልእክት እብ መሰል እንዴ አትለ ሐቆለ ሸርሐ፡ መዋ-መጦርላ ሕክመት ኤረትርያ ምን አምዕል ሕርየት እንዴ አስተብዴት፡ አጀኒት ሕቁቀም እንዴ ተሐፈዘ ዋጅብ መርዲት ወግለዮት እግል ልርከቦ ገብኦ ለህለ ጸገም፡ እብ ፈርሀት ረቢ እንዴ ትረበው ጀላብ እግል ልዕበው፡ ዲብ መጃልት ተዕሊም ወወሳኦል እዕላም ዝያደት መርዲት እግል ልግበኦ እሎም ለቡተ እምነት ሸርሐት።

ሼክ ሳልም ዲብ ደንጎቤ፡ እብ መናሰበት ዲድ መውሉድ አነቢ አሸሪፍ፡ እግል ክሉ ሸዑብ ኤረትሩኦ ወቅዋት ድፍዑ “አሰናይን” ቤለ።

ለዓደትለ ዒኣድ፡ ደረሰ ከላዊ ቁርኣን መዲነት አሰመረ እብ አቅረበዉ እግለ ዲድ ለከሰስ አናሺድ፡ አሸዓር ውበዕድ መዳሊት ሰርጉይ ወጋምል ዐለ።



መክተብ ኡዲተር ዓም ተእሂል ለሀይብ

መክተብ ዓም ኡዲተር፡ ምስል እድንያይ መካትብ፡ ኡዲተር ዓም፡ ወምስል ናይ መንጠቀት ማሕበር መካትብ አፍሪቅዩ ኡዲተር ዓም፡ ምስል መትሃግየት ህግዩ እንግሊዝ እብ መትዓዋን ዲብ አግቡይ ክታበት ወዳሐት ለቡ ፈገሪት ሰኒ ለለሀይብ ተቅሪር ኡዲት ለረከዘዘ ናይ ሐቲ ሳምን ታእሂል ዲብ ሆቴል አሰመረ-ፓላስ ነዘመ።

ገረዝገሄር ገብረመድህን፡ አሀምየት ናይለ ተእሂል እብ ከሰስ ዲብ ሀበዩ ተውድሕ፡ ዲብ አትሐላለፎት ሐብሬ ወተቃሪር ኡዲት ተውድሕ እግል ለሀይ ለሰዴ ክምቲ ሐቆለ ሸርሐ፡ ዲብ አግቡይለ ሸቅል ለዐለት ምሽክለት ዲብ አቅለሎት ፍገሪት ሰኒት ክም ለሀይ እግሉ ወድሐ።

ለአሰክ ጅምዓት ዮም 15 ኖቨምበር ለለአተላላይ ተእሂል፡ መእተዩ ዓም እግል ገበይ ክታበት ተቅሪር፡ አትሐላለፎት ሐብሬ፡ ወተሐይስ ተሐምቅ ራትዐት ነቲጀት እግል ትትረከብ፡ ዲብ ሸቅል ናይ ኡዲት ዓዲ አግቡይ ክታበት፡ ዲብ ገበይ ቅራኡት አትሓየሶት፡ ወበሰር ክታበት እት ወራት ኡዲት፡ ረተቦት ሐብሬ ክም አሀምየቱ ለልብል ብዕድ መጃላት ሸምል።

ኡዲተር ዓም አሰይድ

አፍዐበት፡ መዳሊት እግል ክታበት ሕማም ያብሶ ተምም

ዲብ ምዴርየት አፍዐበት፡ ዲብ እሊ ግዳርን እግል ገብኦ ክታበት ያብሶ ገብኦ ለዐለ መዳሊት ክምሰል ተመ ትሸረሐ።

መስኡሊን ደዋዬሕ፡ ወካይል መእሳሳት ሕክመት፡ ክምሰልሁመ ሰብ መቅደረት አኣፍየት ዲብላ ሻረከው እቲ ልቀኦ፡ መክተብ ወዛረት ዓፍየት ናይለ ምዴርየት፡ አምዕል ወኣኑን ክታበት ዲብ ክል ዐድ አቅረበ ወእብ ፋዬሕ ሀድገ

እቲ። መስኡል እዳረት ወማልየት ናይለ መክተብ አሰይድ አልአሚን መሐመድ ዐሊ ዲብላ ቀደመዩ ከሊመት፡ እብ ደረጀት ደውለት ለትገብኦ ክታበት ምን ልውሕድ 95 ምእታይት እግል ልብጸሕ ቅሩር ክምሰል ህሉ፡ ዲብላ ምዴርየት ህዩ ለሰታት 97 ምእታይት እግል ልብጸሕ ክምቲ እንዴ አሸረ፡ ዶር መስኡሊን ደዋዬሕ እግል ልዕቤ

ትላከ።

ክታበት ያብሶ እብ ደረጀት ወጠን፡ ምን ዮም 15 አሰክ 30 ኖቨምበር፡ ክምሰልሁመ ምን 15 አሰክ 30 ኖቨምበር ሺታሚን ኤ እግል ልትህዩብ ቲ።

መዋ-መጦርላ ምን 1 አሰክ 30 ሰነት ለዓማርም ለትትህዩብ ክታበት ያብሶ፡ አሰክ ሐምሰ ሰነት እግል ዕምሮም አጀኒት ሺታሚን ኤ እግል ልትህዩብ ክምቲ ልትእመር።

ግ/በ/ቀየሕ፡ ሕቁቅ አጀኒት ለከሰስ እጅትመዕ ገብኦ

ዲብ አቅሊም ግብለት በሐር ቀየሕ፡ ዲብ አከዶት ሕቁቅ አጀኒት ሀወኖት ዲራይ ለመድ ለሀድግ ሰብ ሸርከት ላተን ጀሃት ሕክመት ወጅበህት ለሻረከው እቲ እጅትመዕ ዲብ ዮም 7 ኖቨምበር ዲብ መዲነት ዐሰብ ገብኦ።

ምን መካትብ መርከዘ ውዛሪት ዓፍየት ወዐመል ወራዐየት እጅትማዕየት ክምሰልሁመ መሕበር ወጠን አዋልድ አንሳት ለመጽአው ሰብ መቅደረት፡ ዲብ ዴራይ ዐዋዲ እብ ዓመት፡ ክሸቦ አንሳት ወህዳይ ምተሐት ዕምር ህዩ እብ ፍንቲይ ለሰብሎ ደረር ዓፍየት ወዐቅል አብሳር ሀወኖቲ፡ እብ በሐስ ለተለ

ፋዬሕ ተውዴሕ ሀበው።

እግል እሊ ሀድፍ እሊ ለሸቅዩ ጀሃት እብ ጀህት ጀህተን ወድያሁ ለዐለዩ ወራታት፡ እግል ሀላክ ወበዘርት አርዛቅ ለዋሌ ሰበት ዐላ፡ ለለአደሚዕ ወቀይ እግል ሰርገሎት ለትመቅረሐ ጸገም ሕበር እግል ልግበኦ እንዴ አትፋቀደው፡ አሰክ እዳራት ድዋዬሕ ለልትከሬ ልጃን እንዴ ትከውን ለአወቁ ክምሰል ህሉ፡ ክምሰልሁመ ምን 2020 አሰክ 2024 ለልትመደድ ስትራተጂካይ ስታት ዱሉይ ክምሰል ህለ ሸርሐው።

ናይ ዶሉ መስኡል ፈሬዕ ውዛረት ዐመል ወራዐየት

እጅትማዕየት ናይለ አቅሊም አሰይድ ዮሴፍ ፍሰሃይ እብ ጀሁቲ፡ ክሸቦ አዋልድ እግል መኔዕ፡ ዲብ ወቀሎት ፈሀም ለረከዘ ለትመቅረሐ ጅህድ አፍረዐት ሕክመት ወመጅተመዕ ክምሰል ለትሐዜ እንዴ አሸረ፡ እሱሰ ለህለ ልጃን እብ ጅድየት እግል ልሸቁ ትላከ።

እብ ጀህት ብዕደት፡ ዲብ ራዐየት ደረሰ ወአጀኒት ለትፈረረው፡ ምን ክሉ መዳርስ ናይለ አቅሊም ለትወከለው መደርሲን ወደረሰ፡ ዲብ አከዶት ሕቁቅ አጀኒት ለሰዴ ምህር ክምሰል ተህዩበ ወኪል ኤሪነ ሐበረ።

መ/ወ/አ/አ/ኤ/ እግል እሕትፋል 40 ሰነቱ መዳሊቱ ወዴ

ዝክረት 40 ሰነት ተእሲስ መ/ወ/አ/አ/ኤ/ ዲብላ ትፈናተ ድዋራት ዐድን እብለተፈናተ መዳሊት ልትዐዩድ ህለ።

እብ አሳሰለ መናሰበት፡ ዲብ ምዴርያት ጋሽ ለዓል፡ ሻምብቆ ወአቅርደት ወራታት ኬወ ውበዕድ ለለትፋዜዕ በራምጅ ክምሰል ትሰርገለ ወካይል ኤሪነ ሐበረው።

መስኡል መ/ወ/አ/አ/ኤ/ አቅሊም ጋሽ በርከ አሰይድ ዶሕደገ ዩውሃንሴ ቀድየት

አከዶት ሕቁቅ ወመሳዋት አዋልድ አንሳት፡ ዲብ መጃላት ዐማር እብ ለርእያሁ ህለዩ ዛይድ ወቀይ ክምሰል ደረዐ እንዴ አሸረት፡ ሄራር 40 ሰነት መሕበር ወጠን አዋልድ አንሳት ኤረትርያ እግል ሰሙድ ወመትሰሳል አዋልድ አንሳት ኤረትርያ ለለርኤ ክምሰልቲ ሸርሐት።

እሊ ክእን ዲብ እንቲ፡ አሰይደ ዶሕደገ መሕበር ወጠን አዋልድ አንሳት ኤረትርያ ዲብ ምዴርየት ነቅፈ መትካሙ እንዴ አደቀበ ለሰተቶ በራምጅ ዐማር እብ

ሰፋየት ወመቅደረት እግል ልሰርግል ለሀድገ እጅትመዕ ወደ።

መስኡለትለ መክተብ አሰይደ ራየት ዐሰማን፡ ዲብ ፈዛዐት ለረከዘ መትካም አዋልድ አንሳት፡ ለትሰርገለ መካሰብ እግል ሕፍዘት ወዲብ ሄራር ለሰድፍ መታክል እግል መትዐዳይ አሀምየቱ ዛይድ ክምሰልቲ እንዴ አሸረት፡ ድንገር ለመድ እግል ሀወኖት በራምጅ አብደዮት ቅዌት እግል ሰርገሎት ጸገም ትሩድ ገብኦ ክምሰል ህለ ሐበረት።

ኤረትርያ ጸሐፊ

ክል አርቡዕ ለትጠ'በዕ ጀሪደት

መዳልየት፡

- መሐመድ እድሪስ
- ከልሹም መሐመድ
- አድም ሳልሕ
- ሳልሕ እድሪስ

ለይኣውት ወአርተዖት

- * ዘህረ ዐሊ
- * ፋዋነ አድም

ተለፎን። 121797/07121322

ፋክስ። 127749። ዕ.ሰ.ቡ። 247

ተውዝዕ ጀሪደት።

ተለፎን። 200454

አትአመሮት።

ተለፎን። 125013። ዕ.ሰ.ቡ። 1284

7^ይ ክፈለ

ሳልሕ ምን ሱግ ክምሰል አቅባለ፡ ለዐራት ወለክርሲ እንዲ ተሐበለው ወእንዲ ትነወረው ክምሰል ጸንሐው ሰኒ ፋርሕ ወልወቅ ዲብ እንቲ፡ እዲሁ ዲብ ጂቡ እንዲ ከረ ከተመህ ሐቀለ ቤለ ክልኤ ምእት ነቅፈ መጭ አበሉ፡ ከእግል ድርሆይ መጠየ። ድርሆይ ላኪን እብ ኩብዱ እግለ ረክበዩ ነወል ፋርሕ ምንመ ዐለ፡ እበ ምር እንክር ህዩ ለግሩሽ መትከባተ ዔብ መሰለት እቲ፡ “ላለ ላለ...” አነ ምንኩም ግሩሽ ይእንሰእ “ክመ ሱዳንዩን ዐሌዬ ብጠላግ እግል ይኢበል ወይእምሐል ላኪን ቀደም እለ ለሐደግኩውን ከፊኒ አዜ እለ እት ሽፍር ለህሌት ሳልሳይት እሲቼ ላተ ይሐድግ” እት ልብል ሳልሕ ወድርሆይ ለሀይ እንክ ዲብ ልብል ወለሀይ አበደን እት ልብሎ መደት ሐቆ ከልአው፡ ዲብ ደንገበ ድርሆይ ለሐቲ ምእት እንዲ ትከብተዩ “እለ ትከፊኒ” ቤለ ከለ ካልኣይት ምእት አበዩ እቲ። ሳልሕመ ሐቆ እለ ላተ ዲብ ደከለት ህያብ ይአተ። ለሐቲ ምእት ነሰአ “ከሚቲ እንተ ሰለሰ እሲት ባጽሕ እንተ ድርሆይ?” ዲብ ልብል ሰኣል አትሐደሰ እቲ።

ድርሆይ ዲብ ልሰሐቅ፡ አነሹ ሕጹዩ ወህዱዩ ክምሰልሁመ ዕንቺ ለተሐውረረቲ ክሉ ምን አሰእለክ ወትፈክርኩ ምን ይሐሴ ጋንተ ካምለት ገብእ።” ዲብ ልብል አሰሐቀዩ። ሳልሕመ ዝያደት ተፋሲል ሰበት ሐዘ ቁቀት ገብአ እቲ ወእብ ሰበት እሊ ድርሆይ ለቤለዩ አንሰ እግል ለአምር ሰበት ሐዘ ፋራጉ አበ። ድርሆይ ለሰኔቲ ክምሰል ብዕዳም ኢሰትር ወኢላሓቤዕ፡ ክሉ ዲቡ ለጀረ ተዩልል ዲብ መሕበር ሰበት ከፍክፋ ሐዋቲ ዶልዶል ምነ ሀገጊቲ ከጅለ። ላኪን ህቲ አመሉ ሰበት ገብአ ወብዙሕ ሰበት ኢከጅል እቡ ክሉ ለሐልፈ እቡ አሰሉል ሐያት ርትዕቲ ወግምጪቲ በረው ለአብሉ እግልኩ። እብሊቲ ህዩ እግል ሳልሕመ እብ ሰበትለ ሓጺህን ለዐለ ሰቦ ወለት፡ እብ ሰበትለ ተሐውረረዩን ከዕንቲ ለከረ እተን ሰቦ ሽንብፊብ ወእብ ሰበትለ ሀደዩን ሰለሰ እሲት ክልኤ ምነን ለሐድገዩን በህለት ቲ ክለን እብ ሐትሐቲ እንዲ ኢለሐብዕ ወኢሰትር ደግመ እሉ። ሐማሁ ህዩ ለወድ ብክሩ አሰክ ፋንኮ ለሳረሐ እታ ተ።

ሐቆ እለ ህዩ ድርሆይ ሰኒ ፋርሕ ዲብ እንቲ፡ ምን ጠቢዐቲ መትዳዋር ወተሸምየት ሰበት ፈቲ፡ አሰክ ሰላት አመቅረብ ተምም እሉ ዲብለ ዝያደት ዘሕመት ለብእቲ ባካት ሱግ ኩዳር ወቤለ-ርብ ከረን ዶል ከእብ ሻሬዕ ምር ዲብ ልትገንቤ፡ እብ ግርመተ መዲነት ወሸዋረዐ ሰኒ ርዩሕ ወፋይግ ዲብ እንቲ አምሰ። ለዲብ ጂቡ ዐለት ምእት ነቅፈ ህዩ ረቢ ሸር ምር ጋሻይ ከልአዩ ምንገብእ፡ ፈንገሕ

ድርሆይ ወዝክርያቱ

አሰክ አፍዐበት ነወሉ ዳምን ዐለ። ጋሻይ ሳደፈዩ ምንገብእ ላኪን ድርሆይ ግረ ሰበት ኢልብል “ነዐ ንደረር እበን” እንዲ ቤለ ምክራዩን ክምሰል ለአቀዌ ሸክ ኢዐለ እሉ። ድርሆይ እብ ሰበትለ ሐጸዩን ወተሐዋረረዩን አዋልዶታት ዲብ ለአትዋይን ሐቲ ትቅብ ሰበት ትቤ እቲ አሰልፍ እበይት ትሰሐቀ ወሐር፡ እብ ሰበትለ ጀሬት እቲ ቅሰት ምሰል አርወሐቲ እት ዳግም እት ዝክርያቲ አቅባለ።

አምዕል ሐቲ ድርሆይ ምን ሰንዐፊ እጃዘት ሰበት ተህዩበ አሰክ ነቅፈ እት ገይሰ እት አሰመረ እተ ዲመ ሽብብ ለልብሎም ዐድ ሐሁ አብጀማል ሸክፈ። ዐድ አብጀማልመ እብ ምጽአት ድርሆይ ሰኒ ፈረሑ፡ አሰክ ነቅፈ እግል ልልኣኩ ክምሰልሁመ ገሌ ሸቅል ነሐር ለለሐዜ ወራታት ህለ



ምን ድማን አሰክ ድገሉብ ድርሆይ፡ ዐመር ናሬ አብጀማል(25-11-1991)

እሎም ምንገብእ እንዲ ኢከጅሎ ምዕል ወክልኤ ምዕል ለውዑሉ። ህቲመ ሰኒ ዋቂ ወጣዬዕ ሰበት ገብአ እብ ገጽ ፋርሕ ልትከብዩም ወደለ እለ ቤለዉ ለአገዳ እሎም። እብሊቲ ህዩ ለምበ ማጽእ ሰበት ዐለ፡ ሪገት ለምበ እግል ልጽበዋ እሎም እሰቡሕ ናይ ሐምሰ ልትር ጃሎን እንዲ ሀበው አሰክ አካን ተውዜዕ ለምበ ሳረሐው። ድርሆይ ለአካን ክምሰል በጽሐ፡ እምበል አንሰ ወአጀኒት ደፍአት ለገበአ እግሉ ሰነ ክምሰል ሐግለ አሰልፍ ከጅለ ወሐር እግለ ጄሉት ቀደምለ ሰርሱር ለዐለ ሰፍ እመን ክምሰል ከረዩ ሐቲ እሲት እንዲ መጽአት፡ እግለ ጄሉኒ ግረ ኣቲተ። ድርሆይ እንዲ ኢነቅም አተቅበለዩ። ለአንሰ ሕድ በለዐ ወእብ ሰብብለ ሪገት ሰረን ልትበአሰ ወሰረንመ ልትሃጀክ

ዐብደለ መሐመድዐሊ (መዐልም)

ዐለዩ። እሊ ወክድ እሊ ተአተቅብል ለዐለት ምን ግዋሬ ዐድ አብጀማል ላተ እግል ድርሆይ ሰኒ ለተአምሩ ወህቲመ እብ ወቀዩ ርዮሕ ምነ ለዐለ ኖሪት፡ ዲብ ትሰዔ እንዲ መጽአቲ “ለጃሉንክ አዩ ህለ?” እት ትብል ክምሰል ትሰአለቲ ድርሆይ ዲብ ልሰሐቅ፡ “እትለ አካን ሪገት ካርሁ ዲብ አነ ሎህ ንፍሽት እሲት እንተ ግረ እንተ ቲሰኒ ወሐር ለክፈቲ ምንዩ” ዲብ ልብል ለሰእለ ዲብ ህለ ሰኒ እብ ክጅል ዲብ ቀረቅቡ ኣቲ ዐለ።

ኖሪት ለውዲተ እሲት ሰበት ነክደተ ዲብ ትሰዔ እንዲ መጽአት አሰልፍ እግለ እሲት ሽሙይ በሽተነተ ወሐር እግለ ዋድያቲ ለዐለዩ ሰፍ ፈነዋር እንዲ ወዴቲ እግለ ግረ ልክፍት ለዐለት ጄሉን ድርሆይ ዲብ ምግብለ ሪገት ከፊቲ፡

ድርሆይ ምን ዝክርያት እት ዝክርያት እት ነክሰ ህዩ ዲብ ሸዋርዕ ከረን አቅሎለ ወትደረ። እትለ ምሴት እለ ድርሆይ ለዐራታት ዐድ ሳልሕ ክምሰል አሰረ ወእብሊታት ወብዕድ ዝክርያቲ እት ለአትዋይንቲ ዲብ ከረን ልዳወር ለዐለ። ባክ በላሰሪበ ዲብ ለሐልፍ ላኪን ቀደም 25 ሰነት ለትሰወረ እቲ ሰትድዮ ከረን ትቅብ ሰበት ቤለ እቲ፡ ናይለ ወቅት ለሀይ ሱረቲ ትዘክረ። ድርሆይ ሐቆ ሕርዩት እንዲ ኢለአድግቲ ምን ቦርሱዳን ኤራትርዮ ለመጽኢ፡ ለዲብ ሰነት 1990 ዲብ ዐምበርብብ እግል ልትዋጀህ ምሰሉ ለኢቀድረ አብ ጀማል ሐሁ ወዲብ ሰነት 1990 ለናደለ እም ዐብዱ ሕቲ እግል ልርኤቲ ምን ሱዳን እብ ገበይ ከሰለ አሰመረ ለአተ። ዲብ ሕርርት ኤራትርዮ ለወደዩ ዝያረቲ ህዩ ሰኒ ርዮሕ እግለ ዐለ። ሐቆ ሳምን ዲብ አሰመረ ህዩ አብጀማል እግል ልሳርሐ ከረን ክምሰል ትከረውቲ ዲብ ከረን ሐቲ ሱረት ትሰውረ። እለ ሱረት እለ ህዩ እት ታሪክ ድርሆይ ለሳልፋይት ሱረት ዲብ ኤራትርያ ተ።

ድርሆይ ዲብ እስትድዮታት ቦርሱዳን ምሰል ሰፍቲ ወሐዋቲ ሐድ ሰወር ምንመ ኢትሰወረ፡ ዲብ ኤራትርዮ ላተ እለ ምሰል ምናድሊን አብጀማል ወዑመር ናረ ለትሰውረዩ ሱረት ሰኒ ርዮሕ እግለ ዐለ። እንዲ ትሆገለዩ ህዩ አሰክ ቦርሱዳን ነሰአዩ። አብጀማል እስትሸሁድ ኢለሀሌ እት ልብሎ ልትሸከቦ ለዐለው ዋልዴት ወሐዋቲ እብላ ሱረት እለ እግል ለአግክዎ ቀድሮ። ለዲብ ሰነት 1990 ለናደለት እም ዐብዱ ሕቲ ላኪን ምን አሰመረ እት ጄሽ ሰበት ትወዘዐት እትጀህ ዐዲከለ ሰበት ዐለት አሰክ እግል ሊጊሰ በክት ኢረክበ። ድርሆይ እትሊታት ወብዕድ ዝክርያት እት ለሐምሰ ዲብ ሸዋሬዕ ከረን ልትመሼ ወልዳወር ለአምሰ።

ድርሆይ እት መዲነት ከረን እብ ሓድረት ወሓልፈት እት ለሐሰብ ወለትአትዋይን፡ መዴነት ከረን ሰኒ ረይሐቲ። ምን ፋንድቅ ከረን ሸንክት ቅብለት እተ ህለ ሐረከት ትርድት ለትገብእ እቲ ድዋራት ክምሰል አተጀህ፡ ምን ቅብላት ፈርሸት እክል ወለ አሰክ መቅበረት ዋልዶን ለነሰእ ሻርዕ ሰኒ ዘሕመት እት ብእቲ ረአዩ። እበ ሻሬዕ እት ልትመሼ ህዩ ድገለብ እትለ ህለ መጣዕም ወገዋዊ ለብእቲ በረንዳት ውልብ ክምሰል ቤለ አዜመ ዝክርያቲ እት ሰነት 1995 ለበልሰ ቴለል ትቅብ ቤለ እቲ።

ለወክድ ለሀይ ድርሆይ ምን ቦርሱዳን ዋልዴት ወሐዋቲ እንዲ ከማከመ ዲብ ነቅፈ ሐድረው። ላኪን ዲብ ነቅፈ መሐደር ለትገብእ ቤት ሰበት ይዐለት እሎም ሰኒ ሹቁላም ምንመ ዐለው፡ ሰእዩቶም እተ ክልኣት ምናድሊን ሐዉ አብጀማል ወእተ ወክድ ለሀይ ምን ጄሽ ሱርሕት ለዐለት እም ዐብዱ

ሕቲ ዋዲሁ ዐለ። እም ዐብዱ ምሰለ ናይ ትሰዒን ለትሳረሐው ምናድሊን ናልልፍ ነቅፈ እንዲ ተህዩበዩ ሱርሕት ሰበት ዐለት፡ ሰር ናይለ ሰላዲህ ዐደ እግል ተትሕድር እቡ ናውዩት ሰበት ዐለት ለ2አልፍ ነቅፈ ምነ ናይ ሰርሓህ ግሩሽ እግል አብጀማል ሐሁ ሰለመተን ወእግል ዐድ አትሀድር እበን ቲሉቲ።

አብጀማልመ ምሰለ እም ዐብዱ ሕቲ ለሀብቲተ ሰላዲ ወምነ ዐለ እተ ውሕደት ለረክበዩ መሳሪፍ እግለ ምን ሱዳን ቃብላም ለዐለው ዐዱ ስምነ እኩም መሳሪፍኩም እሊቲ ወቤትመ አዜ ምን እለ ሰላዲ እምዐብዱ እንበንዩ እኩም እንዲ ቤለ ሰጀዐዮም። እብሊ ህዩ ዲብ ፈለክ ምር በናይ እንዲ አምጸኢ፡ እብ 500 ነቅፈ ቤት አተብነዩ። ብዕድ እግል ዘንክ ወመራይን ህዩ ከረን እንዲ ጌሰ እግል ልዛበዩ ቀረረ። ድርሆይ እት ከረን እግል ለዐርዩ እንዲ ሐበረዩ ህዩ ምሰል መለሀዩ አብ ካልድ አሰክ ከረን ትወከለ።

እተ ወቅት ለሀይ ሐበት ዘንክ 35 ነቅፈ ወመሪነትመ እተ ክምሰልህ ሰበት ዐለ እበ ዐለ ምሰሉ ሰላዲ 15 ዘንክት ወሰሰ መሪነት እንዲ ትዛበ አሰክ ድርሆይ ምን ነቅፈ ለዐርዩ ዲብ በረንደት ናይ ምር መዋዕም ከረዩ። አብጀማል ወአብካልድ ዲብ ከረን እት እንቶም ድርሆይ ወሸሂድ ዐሰማን ላኪን ዲብ ነቅፈ እት ህዳይ ፍሩራም እንዲ ዐለው ክምሰል መጽአው መካይን ሰበት ሐግለው፡ ምን ነቅፈ አሰክ አፍዐበት አሰክ እግርም ልትለሀፍ ሄረረው። ገበይ ነቅፈ አፍዐበት ሰኒ መራር ሰበት ገብአት፡ ዝያድ 60 ኪሎሜተር እብ እግርክ እግል ትካትሩ ሰኒ ስዱዱ ቲ። ላኪን ድርሆይ ተአከረ ምን ገብእ አብጀማል እግል ኢልትበአሱ ሰበት ፈርህ ሰኒ ትሻቀሉ። እብሊ ህዩ ድርሆይ ወመለሀዩ ሐቆ አድህር አፍዐበት ክምሰል አተው፡ ምን አፍዐበት ምር ገላብ እንዲ ረክበው ምሰሉ አመቅረብ ከረን አተው።

ድርሆይ ወዑሰማን ምን ነቅፈ መጽኢ እት ህለው አብጀማል ወአብካልድ ህዩ ለዐፍሽ እንዲ አትጋደው ልታከምም ዐለው። ድርሆይ ወመለሀዩ ከረን ክምሰል አተው፡ ደረረው ወዲብለ ዘንክ ወመራይን ለዐለ እተ በረንደት መጦር ሕድ ዲብ በላዋ እብ ስምምም ክምሰል ገብአው፡ ድርሆይ ወመለሀዩ ምሰለ ዐለ እቶም ተዐብ ኢረአው ወኢሰምዐው፡ አብጀማል ወአብካልድ ላኪን አሰክ ሰነብ ነሰኣም ልትሃጀኮ ዐለው። ህቶም ቀሸው ክምሰል ቤለው ባካት ሳዐት ሐቲ ናይ ላሊ አብጀማል ጭፍር ሰበት ስምዐ በል ምን አበሉ፡ ሰኒ ግርጉራም ለዐለው ተጋሩ ሴርቀት እግል መራይን እብ መልሃዮም ዲብ ልሰሐብ ሰበት ረአዮም፡ እግል መልሂቲ እንዲ ሀረሰ አርብዲቶም እንዲ ገብአው እቶም ደገድግ ወደምም።

ዲብ ገጽ 9 ልተላሌ.....

ሀበሮ፡ እት ሄራር ምህር

ምዴርየት ሀበሮ፡ ሐቴ ምን ምዴርያት አቅሊም ዐንሰበ እት ገብኤ፡ ቀደም ሕርየት መንጠቀት ድፈዕ ሰበት ዐለት፡ አዳመ አብካት ተዕሊም እንዴ ረከበ ኢትዐለመ። እት ሐን ሰውረቱ ላኪን፡ ሐዳይ ምን አጀኒቱ እት መዳርስ ሰውረት ደርሶ ዐለው። ከዲብ መደት ሕርየት እብ ክልኤ ቤት ምህር ለአስተብደ ሄራር ምህር ምዴርየት ሀበሮ፡ ዮመቴ ዲብ ሚ ባጽሕ ክም ሀሉ፡ ምስል ሙዲር ፍርዕ ተዕሊም ዲብል ምዴርየት ለወዳናህ መቃበለት እንዴ ተሌት ትትቀደም፡ ቅራኣት በኪተት፡



ሀበሮ ጸዕደ ወሰክ እፍሱል ተሐዜ

ሰኣል፡ ሄራር ምህር እትለ ምዴርየት ቀደም ሕርየት ወኣዜ ሚ መስል?

በሊሱ፡ ለመንጠቀት ቀደም ሕርየት፡ እት ጀብሀት ሐርብ ሰበት ዐለት፡ እት መደት ንዳል ሐቴ ቤት ምህር ዲብ ዓዩን (አስማዋ ዐዳይ) ሌጠ ዐለት እግለ። ሐቆ ሕርየት ላኪን መዳርስ ምን ገብኤ ወዐደድ ደረሳሁ እብ ሐድ ሐድ ዲብ ወሰክ፡ ኣዜ እት 43 መአሰሰት ተዕሊም ዓርግ ሀለ። መብዝሐ ለመአሰሰት ናይ ንዙም ተዕሊም ብኩይ ምንማ ቱ፡ እት ወሰክ-ዕሸሽ ለልኦደርሳመ ኢልትሐገለ። ምን ረውዳት አስክ 2ይት ደረጃት ህዩ ልትመደድ። በርናምጅ ምህር እግል ዐባዩ ወዐርየም'መ መጥሩ እት ልትጠወር ወበዜሕ መጽእ ለህላ ቱ። እሊ እብ ተፋሲል ዶል ልትረኤ፡ 11 ረውደት፡ 10 መአንብታይት ደረጃት፡ ሰማን ምግባይት ደረጃት፡ ክልኤ ካልኣይት ደረጃት፡ ወ12 ንቃዋ ምህር እግል ዐባዩ ወዐርየም ቱ። እትሊ መዳርስ ዮም ዓመት እግል ልድረሶ ሰጁላም ለህለው ደረሰ፡ 8,493 ደረሳይ/ት ቶም።

ሰኣል፡ ምደርሲን አክልኦም ብኩም ወዲብ ወሰክት መዳርስ ህዩ ሚ በርናምጅ ሀለ?

እትለ ምዴርየት 15 አንሳት ለህለዩ ዲቦም 220 ምደሰ ብኩ። ገሌ እት መደርሲን ለልትረኤ ነዋቅሰ ምንመ ሀሉ፡ ለመአሰሰት ካምል ቱ፡ እብ ተውዜዕ ለመጽኢን ምደርሲን ሰበት ለህሉ ህዩ፡ ምደርሲን ዶልክ

እት ወሰክ ገይሶ ህለው። መዳርስ ሐዲስ ለልትቤ ምንመ ኢህሉ፡ ሐምስ መድረሰት እተን ናይ ሐምሐምስ ፈሰል ወሰክ ጋብኦ እግልን ሀሉ፡ ወእንዴ ትበነው ነኦደርስ ዲቦም



2ይ ደረጃት ዐሪታይ

ህሌኩ።

እት ተዕሊም ምን ወክድ ዲብ ወክድ ተጠውር ልትረኤ ሀሉ፡ ዮም ዓመት መድረሰት ሐሊብ ሰቴ (ፍልፍሌ) እት 2ይት ደረጃት፡ መድረሰት አፍ-ዓዩን ህዩ ዲብ ምግባይት ደረጃት ዕዱያት ህለዩ። መሻረከት አዋልድ አንሳት እት ረውደት፡ እት መአንብታይት ደረጃት፡ እት ምግባይት ወዲብ ምህር ዐባዩ ለትወቀለት ቱ፡ እት ገሌሁ ዝያደት ውላድ፡ ወዲብ ገሌሁ አክለ ዐደድ ውላድ ተን። እት ካልኣይት ደረጃት እት ልውሕደ ገይሱ፡ ለሰብ ህዩ ለመዳርስ ካልኣይት ደረጃት ረዩመን ሰበት ቱ ወህተን እብ ሾለቢ እግል ልድረሰ ለመጅተመዕ ሰበት ኢሳዕደን ሌጣቱ። ገሌሁ አጀኒት ነኦይሹ፡ እት ዕምር ድራሰት ባጼሕ ዲብ



ደረሰ 2ይ ደረጃት ዐሪታይ

እንቱ ለኢትሳጀለው ህለው እግልን። እሊ ለገብኦ እብ ምስምሱ፡ ለሰካን ክምኩማም ሰበት ኢኮን፡ እት ግርሆም ፍንጡራም ዲብ እንቶም ለነብር ሰበት ህለው ቱ። እሊ ሸዐብ እሊ ትጀመሪ ምን ገብኦ፡ ለአጀኒት አብካት ተዕሊም ክም ወረክበው አኪድ ቱ። እሉም ምህር እብ ዕምር ለልሐልፎም አጀኒት ህዩ ሕናመ ኢነኦዝም ምናም፡ እት ምህር “ዐርየም” ሰበት ነኦትዮም፡ ኩሉም እት ምን 9-14 ሰነት ዕምር ለህለው እብ ዐርየም እት ሰነኖም ክም ልትሓበር እንወዴ ህሌን። እሊ ምህር ዐርየም ህዩ እብ አሳሰለ ጠለባት እዳራት ደዋዬሕ ሰበት እንወድዩ፡ ለተዕሊም እት አፍያቶም ክም ነኦመጽኦም ቱ እንወዴ።

ሰኣል፡ ፍገራት ተዕሊም እት መጅተመዕ ከኣፎ ህሌት?

በሊሱ፡ ተዕሊም እት ምዴርየት ሀበሮ ሰኢ እንቀይመ። መደርሲን እዩሳም ቶም ውበዝሕ ኢቀይሶ። ላመ ደረሰ ደረጃት ሰኢ እት ጃምዓት ውበዕድ መአሰሰት ለልኦመጽኦ ሰበት ህለው፡ ለመጅተመዕ ልትቀየር ህለ እግል ኒበል እንቀድር። መሰለን እት

ለትወቀለት ደረጃት እንክድም ዲብ ወሰኒ ገይሰ ሀሉ። ክል ቤት ምህር እብ ዓማር ፍረቀ እንዴ ከወነት እት ርያደት ወግዳት ተአሻርኩ።

ሰኣል፡ እት ናይ 2ይት ደረጃት ለልኦትሐዜ ኣላት ክም ኮምፕዩተራት ወመዓምል በን ገብኦ?

ሰኣል፡ ናይ ኦብያት ቅራኣት፡ምስለ ደረጃትለ ደረሰ ለገይሰ አክትብት እግል ልትህየበን ሰኡላም ህሌን፡ ወምን ቀደም እለ ለእንመልኩ አክትብት እብ እንቡታመ ህሌን፡ መዐመል ወICT ህዩ ሐሬ ንጠውሩ ብህላም ሰበት ህሌን፡ እት ስታቲብ ለህላቱ።

ሰኣል፡ እት 2ይ ደረጃት ለአዋልድ ነቅሰ ህለዩ፡ ለሰብ ሚ ቱ ትብል?

በሊሱ፡ ወላሂ በክት ኢህለ እለን እግል ልዋሰለ ይንኡብል፡ ሰበት አስክ ቦርዲን ደቀምሐሬ ኮተት ሰበት ብኩ። ምናተ አስክ ታሰዓይ ዶል ለሐልፈ፡ ለዋልዲን በረ ምናም እግል ለአድሩሰን ኢቀድር፡ እት ቅሩሶም ዲብ ዐሪታይ ወፍልፍሌ ለአደርሶ ህለው፡ በረ ምን እለን ለህለው ሰካን ላኪን ሪም መድረሰት ሰበት ሀሉ፡ ለገበይ ለእበ ለአድሩሰን አክል-ሕድ ውጢት እሉም ኢህሌት፡ ከእብሊታት ለኣትካርመ ትርእየን።

ሰኣል፡ እበ ምህር ዐባዩ እት ጀነራል ወማትራክ ለሻርት ብኩም?

በሊሱ፡ እት ሀበሮ ጸሊም፡ 15 እሊት ምግባይት ደረጃት ደረሰ ዐለዩ ወእምተሓን ጀነራል እቱ አሻረክናህን፡ ለ14 ምነን ህዩ ሐልፈዩ። ምናተ አንስ ሁዱያት ሰበት ተን፡ ካልኣይት ደረጃት ምህርህን እግል ለአተላልዩ ለንዩት ብምንመ ህሌት፡ እት አፍያተን ለደርሰ እብ በክት ሕጉል ሀሉ። ሾለቢ ጊሰ ከድረሰ እግል ኒበለንመ ይእንቀድር። እት ዐሪታይ ቅሩብ ለህለዩ፡ ምስለ ደረሰ 2ይ ደረጃት ደርሰ፡ ክም ፍክረት ላኪን፡ ዐቅምን እንዴ ገንሐኩ፡ ክልኦት



መስኡል ተዕሊም ም/ሀበሮ ዐሊ ዐቢ

ወተብዕን ምን ሕኔት ለኣትካርም፡ ሴድያይት ወገብኣት ዐለት እንብል። ወእንሻለህ ግረ እላመ ምነ መጋይሰ ደቀምሐሬ ለአጀኒት እግል ለዓርፍ፡ ቦርዲን ምን ትገብኦ እግሉም ሰርገል ዐቢ ዐለ እንብል። ኣዜ ደቀምሐሬ ለእነድኦም መራቀበት ሰኔት እበ እዳረት ቦርዲን ደቀምሐሬ ሰበት ትገብኦ እሉም፡ ሰኢ ገይሶ ህለው።

ሰኣል፡ ሓሊት ምህር ዐባዩ ከኣፎ ህሌት?

በሊሱ፡ ለዐርየም ኖሱ ምስል ምህር ዐባዩ ነሐሰቡ። እት ሰለሰ ሰነት ክም ነኦትዐርየም እንወዴ። መብዝሐም ሰኢ ገይሶ፡ ሐዳም ላኪን ቅዌት እንዴ አብደው በጥር። ከእሊመ እኩይ ኢኮን። መጅተመዕ ትቀይር ሰበት ህሌኩ፡ ጅህድ ብዙሕ ለኣትሐዜ ድኢኮን ሰኢ ገይሶ፡ እት ምህር ዐባዩ ለብዕድ ህዩ መብዝሐን አንሳት ለብኡቶም ብዝሓም ነኦደርሰ ወሰኒ ገይሶ ህለው፡ ደረጃት መአንብታይት ለአተሞ ወሐቆህ ህዩ ክሊን ለንታከዩ አብካት ብዕድ ነኦኖኪ ህሌን።

እብ ዓመት አብካት ተዕሊም ዲብ ምዴርየት ሀበሮ እት ልርሕብ ገይሰ ሀሉ፡ ለኢትከምከመ ደገጊት ሰበት ህለ ላኪን፡ ልሰዕ ለመሐልክ ምን ኩሉ ለአጀኒት ቡሎሕ ኢህለ።



ደረሰ ሀበሮ ጸዕደ

መደርስ እግል ንፈንቱ እለን ነሐሰብ፡ ምናተ ከኣፎ ክም እንወዴ አስክ እለ ቅሩራም ኢህሌን።

ሰኣል፡ ቦርዲን እግል አትካራም ደረሰ ወኣትቃለለት እልኩም፡ ከቦርዲን ልትሐሰብ እንሰር?

በሊሱ፡ እት ውሳረት ተዕሊም ቦርዲን እንግልብ ላኪን፡ አስክ እለ ሰእዩት ህይብትን ኢህሌት። ቦርዲን ትፈተሐት ምን ገብኦ ላኪን፡ ለእማት እግል ልድረሰ ልተረድ ዲቦን ድኢኮን፡ ለብዕዳም ደረሰ አንሳት ልግበኦ

ምነ ምዴርየት እንዴ ደርሰው ዲብ ደረጃት ሰኢ ክም ደካትረ፡ መሆንድሲን፡ ምደርሲን፡ ሐካይም፡ ሰብ ምህናት ቴክኒክ ውበዕዳም ሰብ ምህነት ህዩ እንዴ በዝሐ ገይሶ ህለው፡ እት ክሉ መአሰሰት ሕኩመት ህዩ፡ እት አሽቃል ወኣካናት ሰኢ ለህለው ውላድሰ ምዴርየት ከማን ሕዳም ኢኮን። ከምህር አሳሱ ሐዳረት ወመትከምከም ሰበት ገብኦ፡ ሸዐብ እግል ልትከምከም ፍርዕ ውሳረት ተዕሊም ወእዳራት ከድሞ እቱ ለህለው ወቀይ ሰኢ ቱ።



ሐምድ እድረሰ ዐዋቱ



ጅጉር ምን ከለዋክ አቅብል እንዴት ብህላ ከም አቡ። አምዕል ሐቱ ከረ ሐምድ ዲብ ሀደምደሚጋዊ። ዲብ ቤቱ ስስ ዲብ እንቶ አሰረዎም። ሐምድ ህዩ ክእን ቢለዩ”ጅጉር እንተ” አይወ እን ጅጉር”ፔክጅጉር ዮም ረበክ መን”ዮም መንቱ ረቢከ?” ረቢዬ ረቢልዓለሚን። እንተ ካፍር ወአነ ሙሰልም” ቤለ ከበልሰ እቱ። ሞት ኢትተርፈኒ እንዴት ቤላቱ ወለ ሕጃብ አምነ ክሉ ረአሱ ኢፈርሀ።

እበ ልትጀሰስ እቡ ለዐለ ከም ትሰአለው ወክሉ ከም ለአመዩ። ሞት ሓከመው። ከም ኢልምሐኩ እንዴት አመረ። እግለ እርወሐቱ ለአንግፍመ ኢተሐሰበዮም። ሐቱ ሰላት ሌጠ እግል ትትሰማሪ እግሉ ጠልቤ። ሰላት አመቅረብ ቅሩብ ሰበት ዐለት። ሰኒ ትሰሌ ቤለው። ደዐ እግል ሊዴ አንበተ ምናተ ምን ቅያሶ ወልዐል አብዝሐዩ።

ከም አደገ ስሕር ወዴ ለዐለ መሰለ እቶም ከመጅሙዐት ሐምድ እግል ልክሆሉ ኢቀድረው። ብጠር ከላሰ ኬፊከ ቤለው። እድረሰ ወሃርዲ። ሻፍግ ዲብ እንቱ እብ ሰይፍ ዲበ ሰጋዱ ህት ምን አበለዩ። እብ ጀርደት ምን ሸወጠዩ ወለሐቲ ኢጉበኡ። እንዴት ፈቱሹ ትበህለ ምንዲ ትፈተሽ ምን ጅወ ሕጃብ ሞብጡብ። እለ ምን ወርከው ምኑ ለዋድህ ዐለ ደወ ምን ገርቡ ጌሰ።

ዲበ መድት ለሀ ሸርሕ ልትአመን እቡ የዐለ። ሰበት ዲበ ጽብጡቱ ኢትዐወተው ለደወ ሻቂ እግል ልምሰሎም ቀድሮ። አማነት እግል ኖሳመ አትሀመሰቶም ወአብሀሰሰቶም እግል ትግባእ ትቀድር። ሞት ሰበት ትሓክመ ላኪን እብ ሰይፍ ልግባእ ወእመነት እግል ልትቀተል ሰበት ቀረረው። ሐምድ “ እንተ ነጅሰ መክሩህ” እንዴት ቤለ ሰይፍ ሐርጠ እግሉ። ዲብ ሰጋዱ ለሐሰበዩ ኢረክበዩ ከገሌ ጨርመ ምኑ። ካልእ ዶል ምን አፍክካመ ኢተዐወተ። እት ደንገበ ላኪን መሰደሱ እንዴት አፍገረ ዲብ ረአሱ ሸወጠዩ ከትካረጀ። ግናዘቱ ትረፍዐት። ምነ ዐለው እተ አካን ሬመት። ሸዐብ እንዴት መጽአ ቀደም ኢቀብሩ ዲብ ረአሰ ግናዘቱ መሰንቅ ዲብ ዘብጦ ሐለው እግሉ ልትበህል።

ጅጉር በዐለ ነሻርብ አዩ ሀለ ለሕጃብ። ጅጉር ከራባከ!
አመቅረቡ ትሰለ ከመ ሆባይ ትገሉ ጅጉር ካርባከ!
አሰላሎም ሰብ ሀይቶ- መሐመድ ጅጉር ሞተ- ጅጉር ካራባከ!
አቡኪ ኪር አላህ ሰነይ ድሩይ ሀለ-ጅጉር ካራባከ!
አቡኪ ኪር አላህ- ጋዊ ሳክን ሀለ-ጅጉር ካራባከ!
አቡኪ ሀዳው -አምር እንቱ ቀወ ጅጉር ካራባከ!
ሀደምደሚ ሀልጊት-ሀደምደሚ ሀልጊት!
ገርህት ተርፈት ወእሲት- ጅጉር ካራባከ!

እብ ክእን አቡኪ እት ልብሎ ለሐሉ ዲብ ሀለው። እብ አማን ወለት ዐለት እግሉ ትግባእ ትቀድር። አውመ ለጀዘ ለሰበዩ ሐዘን እግል አዳሙ

አክል አዩን ክቡድ እግል ልግባእ ከም ቀድሮ እግል ለአብርሃቱ። እብ ሞት አቡህ መረ ለተሰተንትን ወለት ህሩሳም ገብኤ። ሸዐር ወለሐን ምስል ከም ገይሰ እግሎም እንዴት ወደው ሐለው። በዲሩመ ሰብ በዲር ሕላዮም ክእን ዐለ።

ክእን ለመሰል ሕላይ ዲብ ጋሽ በርከ እንዴት ኢልትሐደድ። እት ብዙሕ ትግርኛ ለኩበር እቱ ድዋራት እንዴት ኢተርፍ። እብ ህግዩ ትግራ ለደጉሙ ሰብ ንዋይ ዐለው። አሮት ምን ውላድ ሊባን ላቱ ገብረንገሰ አጽመት። ለዶል ለሀይ ንኡሻይ ወድ ዐሰር አርባዕ ሰነት ገብእ ዐለ። በዐል ንዋይ እንዴት ገብኤ። ምስል ዲበ መደት ለሀ እግል ልትሓበር እቶም ልትሸናሕ ለዐለ ውላድ ዐዱ ሸፈቲት ወልደሰላሴ አዳል ወሃብቶም ግርማይ። ምስል ከረ ሐምድ ዲብለ ትፈናተ አካናት ልትርአው እት ሀለው። እግል ሐምድ ሰኒ ለአምሩ ሰበት ዐላቱ ለሐልዮት ለኢትረሰባዩ።

ጅጉር ለሸሃደቱ-ደግመት ለቃፍላቱ
ጅጉር በዐለ ነሻርብ -አዩ ጌሰ ለሕጃብ
ሀደምደሚ ለሀጊት -ገርህት ተርፈት ወእሲት
ሐምድ ወዳይ እኪት እግል አባዩ. . . !! እት ልትበህል ልትሐሌ እግሉ ለተክሩሪ

ምርወት ወልባብ ሐምድ
ከመ መርባት አንሰ አሸራፍ እግል ለአቅሰን ቅብላት ብዳዌት ፈራር ትገብእ እት ህሌት ከረ ሐጎስ ተምነዎ ምስል ከረ ሐምድ እንዴት ትሓበረው ለሻረከው። ሐምድመ እምበል ፈናታይ ዲን ወቀባይል ክሉ ረድእ ዐለ። ርድአነ ለቤለዩ ሰዴ። ሰብ አውለት እንዴት ኢተርፎ ለትዘመተት ሐሆም ዲብ ሰብኦ በልሰ ዐለ። ለዶል ለሀ ምስል ውላድ ትግራይ ዘሚት ልሙድ ዐለ።

ሐሊብ ምን ሓነ ወሰገ ምን ቅልጭምነ እንዴት ቤለው ለአሰቅሮ ዐለው። ግርህቶም ሐርማዝ ኢለአትየ እንዴት ትበህለ ልትሀደግ እቦም። ምን ድዋራት ማይ አልቦ ወለባን እንዴት ሬመው። ዲብ ሕዱድ ትግራይ ለሰክነው ውላድ ከፈላ ልልትበህሎ ሰብ ትሩዳም ዐለው። ክልኦት ዐለው። ሰለሰ ወለምኖም ወለዐል አክል አዩ ከም ዐለው ለትደሌት አለቡ። ሐሆም ውላድ ትግራይ ዘምተወ ከወልቃይት ተዐዴት። እሎም ንዋዮም እግል ልብለሶ ወልቃይት ከም ጌሰው ሰርም ዲበ ትቃተለው።

ንዋይ ክሉ እንዴት ትዘመተ ከም አፈመ። በዴት ምክራዩ ትቀዌት ትበህለት። ዓይለት ከፈላ እዲህ ብራቀ ከም ተርፈት እምበል ወድ ዐዋቱ ብዕድ ለበልሰ አለቡ እንዴት ቤለው። ዲብ ሐምድ እንዴት ጌሰው ርድአነ ቤለው። እተ ዶሉ ጅማዐቱ እንዴት ነስኦ እለ ውበዕደት እንዴት ነስኦ አቅበለ። እብሊ ዕልበ ከም ወሰክ ሐ ውላድ ከፈላ ምስል አቅንርተ ትወልድ ልትበህል ዐለ።

ገብረንገሰ አጽመት እብ ጀሀቱ። ሐምድ ኢኮን ለትዘመተት ሐ።

ዝሙት ለዐለ ታቦት እግል ልብለሰ ልትፈረር። እምበል ፈናታይ ኩሉ ለሰዴ ወልዓውን እናሰ በዐል ምርወት ቱ።እንዴት ቤለ እለ ለተሌ ዳግም።

ዲበ መደት ለሀ ውላድ ትግራይ ዲብ ሕብረት እግል ዐለው ኤረትርዩን ውላድ ዐድነ እግል ልዝዋቶም አመመው። ዲበ ባኮት ሐቱ ታቦት ሌጠ ዐለት። ለውላድ ትግራይ እብ ምራዶም ለቀንጸው ዲብ ገብኤ። ዐቅቤ በዩኔ ወነጋ ዐቅቤ ለልትበህሎ መስኢን ዐለው እግሎም። ሰልፍ ለዲብ ሕብረት ለዐለት ታቦት ማርያም ዘምተወ ከነሰአው።” ለዶል ለሀ እብ ሐምድ እድረሰ ዐዋቱ ወገሻይ ወልደሰላሴ አዳል ለልትመርሐ። ውላድ ዐድነ አሰርለ ውላድ ትግራይ ተበገሰው። ምናተ። ለታቦት ዘምተው ውላድ ትግራይ ‘ውላድ ኤረትርዩ ክሎም ቀንጸው ከጌለኩምም ህለው ለልብል ከበር ከም ሰምዐው ለታቦት ዲበ አካን ለእት ዐለት በልሰው።

ዲብ ወክድ ብዕድ ውላድ ትግራይ ዲብ ደምቤ -ድመ መጽአው ከሐ ናይ ማርያ ዘምተው። ውላድ ማርያ ዲብ ከረ ሐምድ ዐዋቱ በርዓርያይ ጌሰው ከርድኡ ከም ቤለው። ሕድ እንዴት ትላከው አሰርለ ሸፈቲት ጌሰው ከዲብ ደምቤ-ድንጉል ለትትበህል አካን ዐረዎም። ገብረንገሰ አጽመት ለሓላት እንዴት ፈቅዶ እብ ክእን ለተሌ ሸርሐ።

ሕነ አሰቦሕ ዲብ ውድሐ ዲብ ሕነ ለክፍ አንበተው። ልሆም ሐ ማርያ እንዴት ዘምተው እት ገይሶ። ውላድ ዐድነ ህዩ ለሐ እግል ልብለሶ ዲብ አድብር ደምቤ- ድንጉል ልትሓረቦ እት ህለው። ምነ ውላድ ትግራይ አሮት ትቀተለ ወአሮት ትዘበጠ። ሐ አቅበለት። ምናተ ምነ ሐውነ እግል ሐምድ ወድ ሐ አቡህ ውበእሰ ሕቱ ሐሰን ከራር ትዘበጠ። ምስል አቀዋፍ እንዴት ትማሰለ ለውላድ ትግራይ እግል ልክረፍ እብ ጠልገት መልሀዩ ትጀርሐ።

ባሻይ ሃብቶም ግርማይ ለልትበህል ወድ ዐድነ ምነ ውላድ ትግራይ መስለ ዲቡ ከእብ ከለዋ ዲብ ሐሰን ለክፈ። ዲብ አፍልቡ ዘብጠዩ ከውደቀዩ። ምኑ እንዴት ረፍዐው በርዓርያይ ከም አቅበለ። ውላድ ትግራይ ህዩ ወራር ትላከው

ከምን ዐዲ ዳዕር ጀሀት እንዳሰላሴ ዲብ በርዓርያይ መጽአው። ለመደት ለሀ በዐለ ሐቀ ኢትሰለመዩ ሐ ከረም ኢትትቀድር። ሰብኦ ኡክ! ቤለው ከሀርበት። ውላድ ትግራይ ህዩ አሮት ተላይ ቀትለው ከአካኖም አቅበለው።

ባሻይ ግርማይ እግል ሐሰን እብ ከለዋ እብ ጠልገት ዘብጡ እት ህለ ለረአዩ ምንመ አለቡ። ከም ኢዘብጠዩ እግል ልምሰል ደሚሩ ኢሰምሐ እግሉ። ኖሱ ምነ ምውዳቁ እንዴት ሀረሰዩ ሳምሐኒ ቤለውዩ። ሐሰንመ እብ ዓኒ ከም ኢዘብጠዩ ሰበት ፈሀመ ኢሐመዩ። ባሻይ ላኪን ሐምድ መርባት ወድ ሐ አቡህ እግል ኢልትፈዴ እቱ ፈርሀ። ክሎምመ ፈርሀው እቱ። እት ቅባላቱ ላኪን ሐምድ።

ሃብቶም እንቱም ጀላብ ዐድክም ምስል ረድኦክም። ሀጀምክም ውሓክም በለስክም። ሐሰን ከም ትዘበጠ ህዩ ሐክ ሰበት ቱ። አናቱ እብ ከለዋ ዘብጥኩክ” ቴልክ ከኖሰክ ሀረሰኩህ። ምስል መልሀያምክ ረፍዐክ ከአምጽኦኩህ። ሰበት እለ ልሕዩ ወለሙት እት ተአምር ሰበት ኢዘብጥክ ለተአፈርህ ወተአሰፍ አለብክ ቤለ ከአትዳፍኦዩ። እንዴት ተአሰፈ ጠቢዐቱ እግል ኢልበድል አትናየተዩ።

ገብረንገሰ አጽመት። ምን ንእሹ ለአንተብህ ሰበት ዐለ። ጠቢዐት መሸለዋ ሐምድ እንዴት ፈቅዶ። ሐምዴሁ ወመትዐጃቡ እብ ክእን ሸርሐዩ። እብ ሸክሉ አንበተ።

ሕብር ሐምድ ሐመልሚል ዲብ ጽልም ነትል። ብዋረቱ ሐጨር ዲብ ገብኤ። ሰጋዱ ረዩምቱ። ከም ረከብኩህ ረአሱ ሰበት ሐጭረ እቱ። ከመ መልሀያምክ አፎ ኢተአረይሙ እቤሉ። ረአሰ ምን ረይም ወልትላጼ እለ ወዴ አለቡ። ምን ጭገር ለትመጽኦ ሐሊት አለቡ። ቤሌኒ።

ሰብር ወክህላት ለነቅሰ ምኑ ናይ ጎማት ወምክር ለባበትመ ዐለት እግሉ። ሐውነ እብ ሐምድ ዳግዋ እት ህለው። ለዶል ለሀ ሸፍተ ለዐለ ባሻይ ወልደሰላሴ አዳል። ፋርሰ ሐቀ ገብኦክ ሳብር እግል ትግባእ ብከ። ክመ እስኢን ጎመ አሸዋክ ዐቅበ ለትክህል እንታመ ከሃሎ ለቡ እግል ትግባእ ብከ “ልብሉ ዐለ።

ምስል ሐምድ ለውዐለው ልግብኦ ወለምን ሸፍትነት እንዴት አንበተው ምስሉ

ለዐለው ጠባይዕ ወመካይድ ሐምድ ፍንቱይ እንዴት ሀረሰው ሸክሉ እንዴት ኢተርፍ ሕድ ለመሰል ሸርሕ ለሀይሶ። ምን ተወኩ ህዩ ሰኔቱ እግል ልዳግዋ ፈቱ።

ሐምድ ሰማዋ ወዐረምዱ ዝይዩ ዲብ ገብኤ። እንሩ ሐኩፍ ወቅንጩብ ቱ። ጭገሩ (ኢክመ ገብረንገሰ ለሸርሐዩ)ምን ግረ ለልትአሰር አቡ ሸኩብቱ። አደቡ ግወይቱ። ሰብ እዴ ክሪት ምስሉ ኢገይሶ። እብ ጀፈሩመ ኢለሐልፎ። አድግ ለከርፍ። ነጋድራሰ ለልትካረፍ ጀፈር ሐምድ ኢቀርብ። ደቂ ሸሓይ

ወሐበላ አመልክም ትሐድጎ እንዴት ቤለ ለዐልን እነ ዐለ። ዲብ እለ ምድር አዋዕ ልብለነ ዐለ።

ላብብ ሰበት ቱ። ሚርሓይ ግባእ እነ እንብሉ አሰክ ቶከር ወሀዋሻይት ነሰኦነ ዐለ። ምስሉ እንዴት ገብኦነ ናይ ሀዳይንእንደወ ሐ እንዝምት ዐልነ።

ምስል ሐምድ ዲብ ሕነ ዴደባን እንዴት ወዴነ ንተልሄ ዐልነ። ልብክ ለነሰእ መሰንቅ ናይ ሱክርየ ዘብጥ እነ ዐለ። ምኑ ወለዐል ለዐለ ላኪን እድረሰ ዐለ በኪት (ወሃርዲ) ቱ።

ለበዝሐው ለለአሙሩ። እግል ሐምድ መሰንቅ ዘብጥ ዲኢኮን ለሐሌ የዐለ ምንመ ቤለው። ለሐደው ህዩ ዲብ ገሌ መናሰባት ለሐሌ ዐለ። ጅጉር ሞት ከም ሓከመዩ ኖሱ እብ መሰንቅ ሐለዩ ልብሎ። ዲብ ካልኦይ ሐርብ ዓለም አላፍ ዐላክር እንዴት ነሰኦት ዲብ ቤሐር እግል ወድቀት ኮሎምቦ ለትትበህል መርኩብመ። መሰንቅ ዲብ ዘብጥ እብ ሰቦዕ ዘዐት ሌጠ ክእን ለሐሌ እግል ዐለ ልብሎ።

ኮሎምቦ ዳሊ ኮሎምባ እት ትደነክ ምድር መሰ ዲቤ ህቱ መሰንቅ ዶል ዘብጥ። ለኢሰሴዕ ኢዐለ። እለ እበ ከሰሰ ለአግደ ምስሉ ለዐለው እድረሰ ማሕሙድ ወዐሰማን ሎንጊ ክልኢቶም ምስል ጠቢዐቱ እበ ትገይሰ ገበይ ሸርሐው። እድረሰ ማሕሙድ።

ሐምድ ክል አምዕል ወለ አምሱይ ከም ሰኩብነ መሰንቅ ዘብጥ ዐለ። እብ ፍንቱት ቤላይ ለልትበህል ወተር ዲመ ዘብጡ ዐለ። መሰንቅ ጸብዋ ዲብ እንቱ እንዴት ትሃጌሁ ኢሰምዐከ። ነብረ ምን ተሀይቡመ ሰምዕ ይዐለ። እብ ፍንቱት ቀደምለ እንወድዩ መዓ ርክ። መሰንቅ ዘብጥ ሰበት ዐለ ዮም ገሌ ህለ እንብል። መሰንቅ ዲብ ዘብጥ ድጉጋም እግል ትግብኦ ብክም ልብል ከመክረኒ። ሰብ ተብዕን ሰብ ሰለሰ በቅርት እግል ትግብኦ ቦም ልብለነ ዐለ ልብል።

ናይ ዐሰማን ሎንጊ ዝክርያት ምነ እስድራሰ ለቤለዩ ብዙሕ ምንመ ኢልትፈንቱ። አድሐ ዲኢኮን ላሊ መሰንቅ ዘብጥ የዐለ ልብል።

ሐምድ ዝያድ ምን ሀጃክ መሰንቅ ፈቱ ዐለ። ለሐሌ የዐለ ዲኢኮን ሰኒ ዘብጥ ዐለ ልብል። እብ ፍንቱት ዶል ለሐርቅ ምስል መሰንቅ ልትሃጀክ። መሰንቅ ዶል ዘብጥ አንፎቱት ናፍሕ ሰበት ዐለ። ከም ሐርቀ ነአምር ከዮም ገሌ ጋብኦ ህለ እንብል። ልሕረቅ ወኢልሕረቅ ዱክሰነ ለልትበህል ወተር ዲብ ዘብጥ ሕነ እብ ሰይፍ ወገለብ ንትሳረር ዐልነ። ህቱ ህዩ ሰኒ ፈርሕ ወሐሩቀቱ ትበርድ ምኑ ዐለት።

ሐምድ ክሉ ለአምር። ብሩድ(ሻኩ) እግል ልተልሄ ፈቱ ዐለ። አኑ አጋር። ወኣድም ፋይድ ሰብ ቅደረት ዐልነ። እብ ሰለሰ ወአርበዐት ንተልሄ። ሐምድ ትሩድ ዐለ። ሻፍግ ዐለ። ብሩድ እንዴት ነሰኦ ዶል ልሰዴ ለዐርዩ ኢዐለ። እምበልሁመ ክሉ ሰበት ለሐሸሙ እብ ክጅል እንዴት ዐረዩ ለነሰእ ምኑ ኢዐለ።



አግደ ታክያት ዐውቴ ደረሳይ

ዎሮት ደረሳይ ንዩት ወመተወጃብ ህላ እግሉ ምን ጉበኣ ለአግደ ታክያት ዐውቴህ እግል ልግበኣ ቀድሮ። እሊ ህዬ፡ እግል ተአምር ንዩት አው ዐሽም ብከ፤ እብ ክሱሰለ ርኢኳህ ወሰምዐኳህ ትትወጅብ ማማ፤



እለን ክልኢ ጠቢዐት ሐቆ አሉብከ ምህሮ እግል ትእቤ ትትቀሱብ። ለለዐጅብከ ጋር ሐቆ ፈረግኳህ፡ እግል ዲብከ ለህለ ፍንቱይ መግጽሕ ሐያትከ እግል ትፈርጉ ሰዴኩ። እሊ መትወጃብከ እግል ትንበር እቡ ዶል ትቀድር ህዬ፡ እግል

ዲብ ልብከ ለህሌት ሸንህት ወመቅደረት እግል ትርከበ ትቀድር።

እብ ክእነ ገበይ ዎሮት ደረሳይ ምን አምዕል እት አምዕል አምር ወስክ ክምሰል ህላ እግል ልትሰምዑ ቀድሮ። አምር ትወስክ ክምሰል ህሌከ ሐቆ ትሰምዴክ ህዬ እት ገበይ መትቀዳም ክምሰል ህሌከ አምር። እብ መጦር እሊ ህዬ ሰቡረት ሕልም (ዐሽም) እግል ተህሌ እግልከ ወጅብ። ሰቡረት ዐሽም እግል ደረሳይ ሰኒ ኔፍዓይት ክምሰል ተ እግል ለአንተብህ ወጅብ።

ሰበት እሊ፡ ዲብ ረኣሰ ዐራትከ ሰቡረት ሕልም ውዴ። ዲብ እሊ ሰቡረት እሊ ጋራት ብዞሕ እግል ትውዴ ትቀድር። እሊ ህዬ፤

- እግል ትግብኡ ለትቀድር አው ናይክ ረኣይ



- ለለአትናይተክ አው ዐሽም ለለአውዴክ ክቱብ
- ሰወር ናይላ ለዐጅቡክ አንፋር ዳርሳም ወላባም
- ዲብላ ሳምን ጽብጠ ለህሌክ አግደ ልእከት (ቴመ)።

ፈጅር እንዴ ቀነጽከ እግል ክቱብ ትቀርኡ፤ ምን ልብከ ህዬ ትትወጅብ እቡ። ዲብ ህደፍከ እግል ትብጽሕ ክምሰል ቱ ትለወቅ እቡ። እብ ክእነ ህዬ አፍካርክ እብ ሓጃት እጃቢ ምልኡ። እግል ትትወወት ክምሰል ቱ ህዬ ሸክ ኢትውዴ።

እሊ ክምሰል ወዴክ ክል-

ሕራብ መግልሰ ላባም

- ፍክር አዳም እግል ተአምር ከሊማቱ አተንሴ
- ግሩሽ እግል ትርከብ ኢተአኖኬ፤ ዴማቱ አምር
- ለለአቡኒ እግል እቤ ወአከር እግል እጽብዎ ወቅት አለብዬ። ሰበቡ ህዬ ብዝሓም ለፈቱኒ ሰበት ህለው ወቅቼ እሉም ዲብ መትዘዛር ለሐልፍ
- መትወጃብ እንበተት ልባብ ቱ።
- ሐያት እብ መታክል ለትመልኦት ቱ። ሰበት እሊ ፈርሐትክ ዲብላ መታክል ኢትኣትዩ።
- ልብከ ክልዶል፡ መክ ናይክ ለልትረሰቡ ጋራት እት ፈቅድ ነብር፤ ሰበት እሊ ልብከ ኢተህምሉ።
- ዲብ ሐያትከ ሕውነ ሐቆ ትሰምዴክ፤ እብ ከአፎ ክምሰል ተዓርፍ ተዐለም፤ ምናተ፡ ምን ወራት ኢትብጠር።

አጥዐሚቶ

- አ---ስምዐኒ ሐቱ፤ ለአምረክ መስለኒ ህለ?
- እግልዬ ተአምረኒ?
- አቤ፡ እሊ ገጽከ ይሐደሰ ዲብዬ፤ እት ገሌ ለአምረክ መስል እቼ ህለ?
- እት ገሌ፡ ዲብ አየ?
- እሊ ገጽከ ዲብ ገሌ በሰ ርኢሁ አነ።
- ካልጥ ህሌክ፤ አነ ገጩ ክሉ ረኣሱ ምንዬ ውርኩይ ኢልአምር።



ህግያነ ትግረይት ወተጃረት ከሊማት

እት ዘበን ቅዱም ቱ። ዎሮት ከዋጀ ትግረይት እግል ልድረስ ሰበት ሐዘ ዲብ ዎሮት መትሃግያይ ትግረይት እንዴ መጽኦ እግል ለዐልሙ ትሰኣለዩ። ለነፈር እግል ከዋጀ 30 ከሊማት ትግረይት እንዴ ሀበዩ እንዴ ሐፈዝኳህን ምጽእ ቤለዩ። ለከዋጀ እግል ከሊማት ተርጀመተን እንዴ ኢደሌ ሐፍዘዩን ሌጠ ከመጽኦ። ዲብ አድርሰኒ ለቤለዩ ነፈር እንዴ ቀርቤ። “ገድም ለሕፍዝ ላቱ ሓፍዘን ህሌኮ፤ ምናተ፡ ተርጀመተን ሰበት ይአመርኩ፤ እግል ተአሰእለኒ - በህለት መዓኒህን ወእግለን ለልትመሳሰል ከሊማት እግል ትአሰእለኒ ሐዘ ህሌኮ፤” ቤለዩ።

ለነፈር እት ልትሰሐቅ፤ “ክለን እለን ከሊማት ተርጀመተን ሐቱ ተ፤” ዶል ቤለ፤ “ከአፎ ሐቱ ጉበኣ 30

ከሊማት?” እት ልብል ትሰኣለ ለከዋጀ። ለመትሃግያይ ትግረይት ሰኒ ሃድኦ እት እንቱ፤ “አቤ እለን ከሊማት እለን ሐቱ ተን። ተርጀመተን ህዬ ዘብጠዩ በህለት ቱ።” እት ልብል ክምሰል አፍህመዩ፤ ለከዋጀ ሰኒ ትፈከረ። ሐቱ ከሊማት እግል ትሸረሕ ቅያሰ አክል እሊ ከሊማት ምኑ ደለ ናሰበት እግልከ ተሐፊ በህለት ቱ። ዲብ ልብል ፍይሐ ህግዩ ትግረይት አትወጀበዩ ልትበህል።



እሊ፡ ህግያነ ትግረይት አክልኦይ እብ ከሊማት ታጅረት ክምሰል ተ ወዴሕ እግል፤ እግል መሰል ዘብተዩ እግል ቲባል ምን ተሐዘ ሕርያን ብዞሕ ብከ።

እሊ ህዬ፡ “ዘብጠ፡ ሸወጠ፡ ጠንበቤ፡ ለደደ፡ አሸክረ፡ ሀወሸ፡ ረግሐ፡ ጸፍዐ፡ ሸውነክ፡ በግነክ፡ ፈኣደ፡ ለደደ፡ ዐድወነ፡ ሀፍተ፡ ጨውነ... እሊ ወለ


መሰሉ እግል ቲባል ትቀድር። ከእንትም ህዬ አውኪራም፡ ህግያክም አክል አዩ ፋይሐት ወታጅረት ከሊማት ክምሰል ተ እንትብሃም እብ እንትም ማማ፤ ምን በዲርክም ሕሱራም ለዐልክም አተላልዉ ወወሰኮ

ዲቡ። ቀደም እሊ ባል ካርያም ዲብ ለየዐልክም ህዬ፤ ምን ዮም አንብቱ። ምን ልውሕድ እግል ሐቱ ከሊማት፤ ምን ሐምስ ወለዐል ለመሰለ (ለሸርሐ ከሊማት) እግል ትርከቦ እግላቱ።

ገሌ ምን አምሳላትነ

ትግረይት እብ አምሳላት ሰኒ ርዝቅት ቱ። ከዮመተ ገሌ ምነ እብ ሐርፍ ‘ሐ’ ለለአንብት አምሳላት እግል

- ሐሊብ ውላዱ ሐሰዩ
- ሐቱ ዕንቱ ቀበት ሕጃሳም ልትሸዩም
- ሐይሱ አለቡ ሓይሰ ከራሁ ቱ
- ሐቆ ተሐሚክ ተሐንጃር
- ሐምዴ ወሪም እግል ወሙት
- ሐጨር ወልደክ፤ ወቅቡብ ቀበክ
- ሐየት እት ልርእዉ እብ አሰሩ ለሐዝዉ
- ሐርማዝመ እብ ሰዳይት ሞተ
- ሐሙክ ሸዌት ሐጋይ ኢልሕዘክ
- ሐሮ ሐሊብ ለቡ፡ ዐሙር ማይ ክልስ
- ሐቆ ፍርድ ፈጽም ወሐቆ ሰገ ዐጭም
- ሐሳይ ሰምዑ ለአረይም
- ሐኩ ምርኩበክ ኢረድዩ ወሞትክ ኢለሐዝዩ
- ሐሰት ወሴፈ አክለ ሀንነው ቀሎ



አሳር



ወ

ሰያሐት



ሕላይ ሰብ በዳር

ባቡር ኤርትራዊ ምን እየ አሰክ እየ



ዳልያም ይህሌ። ከገበይ ባቡር ኤርትራዊ ምዶል ምን ምዶል እግል ትሸቁ አምቡተት?

አይወ ገበይ ባቡር ኤርትራዊ ዲብ ቀይም ሰነት 1887 እግል ትሸቁ አምቡተት። ዲብ ወሬሕ ሰልአስ ሰነት 1888 ህይ ለናይ ሰልፍ 25 ኪሎሜተር ተመ ከደሐረ ወክድመቱ አምቡተ። እሊ ናይ ሰልፍ ሸቅል ብሩድ ላኪን አምባል አትካርም ልሸቁ ሐቀለ ጸንሐ። ዲብ ወሬሕ 12 ናይ ሰነት 1911 ገበይ ባቡር ኤርትራዊ አሰመረ አቱት። ወዲብ ሰነት 1928 በህለት ሐቀ 17 ሰነት ምን አሰመረ እንዴ ትገባሉት ከረን ወሐቀሁ አቅርደት ትከሬት።

ዓም አምር እብ ክሰሱ ገበይ ባቡር ኤርትራዊ ጀላብ እግል ለህሌ እግልን ምን ባጸዕ አሰክ አቅርደት ለህሌ ሪም እብ ኪሎሜተራት እብ ክእነ ልሸረሕ።

- 1. ባጸዕ - አሰመረ = 117 ኪሎሜተር ወ 600 ምትር
- 2 አሰመረ - ከረን = 104 ኪሎሜተር ወ 130 ምትር
- 2. አሰመረ - አቅርደት = 188 ኪሎሜተር ወ 800 ምትር

ገበይ ባቡር ኤርትራዊ ምን ባጸዕ ትትገባሉ ዲብ ህሌት ናይ ደንገበ መሐጠተ አሰክ ተሰነይ እግል ትብጸሕቱ ለዐለ። እሊ እግል ልግበእ ህይ ምን አቅርደት እንዴ ሐልፈት ክሉ ለሰትሐዜ ብናሃ አሰክ ቢሻ 31 ኪሎሜተር ምን አቅርደት ባጽሐት ዐለት። ላኪን እትሊ ወክድ እሊ ካልኣይ ሐርብ እዲነ ሰበት ዐረ እበ ክሉ ወዲብ ኤርትራዊ ለዐለ ሕክም ጢላን ሰበት ተፈለለ። ሐቀ ሕክም ጢላን ለገበይመ ተዐጠለት ወምን ቢሻ ገጽ ቀደም ይሐልፈት።

ምሰል ብነ ናይ እሊ ገበይ እሊ ለገይሰ ብዕድ ብንዩት ትሕትዩት

ገበይ ባቡር እትለትፈናተ መዳይን ሸቁይ ዐለ። መሰለን ዲብ አሰመረ አግደ መክተብ ገበይ ባቡር። ክምሰልሁመ ለትፈናታ መካዝን። ወርሽ ወመዐሽጊ ገዲባት ሸቁይቱ። አመበል እሊመ ዲብ ባጸዕ ለትፈናታ ገዲብ ሸቁይ ዐለ አመበልሁመ ዲብ ጊንደዕ። ወባጸዐ ለትፈናታ ዋውር መሐጣት ዐለ።

ገበይ ባቡር ኤርትራዊ እምብል ዲብ ህሌነ ምን መሰዋዕ እንዴ ትገባሉት እብ አሰመረ እንዴ ወዴት ከረን ወምኑመ አሰክ አቅርደት ክምሰል ትትከረኤ ርእያም ህሌነ። ምናተ እሊ ገበይ እሊ ምዶል አምቡተት አሰክ እሊ

ምን መንሰዕ ቤት አብርሂ ላተ እሊት መሐመድ ወድ ናሽሕ እግል ሰመራርዑል ወድ ገዕዳድ ለሰረተ ሰሩረት እግል ንርኤቱ። ለሰሩረት እት ገጽ 231 ናይል ክታብ ህሌት። እሊ ሰሩረት እሊ ሰመረርዑል ወድ ገዕዳድ እግ ከሌቡ አደሐ ሐዩት አተ እት ዕጩት በኣ። ወሰመረርዑል እግል ሐዩት ተዓዩረዩ ወክም ፈግረ እብ ትናት ረግዘዩ። ወለሐዩት ከም ትደመዐ ጠሐረ ከእግል ሰመረርዑል ሓከረዩ። ወለሐዩት እት ለኣኣነን ሞተ። ሰመረርዑልመ ገሌ ክምሰል ትተንተነ እብ ለጸልዑ ሞተ። ከእብሊቱ እሊትለ ማዛዩ ክእነ ለሰረቱ።

ለህይ ለቅበ ኢክህለ ካዩዶት ለሐረቱ ወለህይ ለክንፈር ኢክህለ ክፈግረ ምን ለደብዐቱ ክለን እለን ለኢክለ ከኣፎ አቱ እት ቤቱ

ገሌ እልክ ሐዩት ናሰክ ኢተአግጽዕ ክብዱ ሓጠት ተ ወድርቡዩ ጣቅዕ ሕፋንቱ ከም ለእት ዕንጣጥዕ ወመሪርቱ ክም በርበሬ ባጽዕ።

3. ባጸዕ - አቅርደት = 306 ኪሎሜተር ወ 400 ምትር	ሁመድ አቅርደት= 59 ኪሎምትር ወ 295 ምትር
ፍንጌ መሐጣት ለህለ ሪም እብ ኪሎሜተር ዶል እንረኤ ህይ። መሰዋዕ ማይ አጣል = 29 ኪሎሜተር ወ 247 ምትር	ክሊ ለፍንጌ ፍንጌ መሰዋዕ ወአቅርደት ለህለ መሐጣት።
ማይ አጣል ጊንደዕ = 40 ኪሎሜተር ወ 120 ምትር	ገበይ ባቡር ኤርትራዊ ዲብ ዘመን እስትዕማር ኢጣልዩ ለአምቡተት ወዲብ ታሪክ ገበይ ባቡር ዐድነ ዐቦት ተርኤ ለዐለት ምንማታ። እብ ሰብስ እስትዕማር አቶብዩ ዲብ ተህገጌ ጌሰት። ወዲብ ደንገበ ህይ ክሉ ረኣሰ በጥረት።
ጊንደዕ አሰመረ = 48 ኪሎሜተር ወ 233 ምትር	
ፍንጌ ከረን ወ አቅርደት ለህለ መሐጣት ህይ እሊ ለትሌቱ። ከረን - ሁመድ = 26 ኪሎሜተር ወ 375 ምትር	

2ይ ክፍል

መካዝን ማይ ጀዚረት ደህላክ

እሊ ክቱብ እሊ ምን ጀሪደት ሐዳስ ኤርትራ እብ ተክለወይኒ ነጋሲ ለትዳለ ምኑ ለተርጀማቱ መተርጀማይ ባልሕ እድሪሰ (ገማ)

እሊ እት ደህላክ ለህለ መካዝን ማይ። ሰካን ደህላክ እግል አዝቡን ለገይሰ ሰኒ ዋውር አግቡይ እቡ እግል ልብነውመ አሳሲቱ። ሰካን ጀዚረት ደህላክ

ሸቅዩት ናይ እሊ ዐወሊ ወባሰካት ምን ፋርሰዩን ለለምደዉ ለመድ ክምቱ ለአምኖ። ፋርሰዩን እግል ጀዛይር ወግንራራብ ግብለታይ ክፈል በሐር ቀዩሕ እት ለትፈናተ ወክድ ሩቁቡ ምንመ ዐለው። ሸቅዩት ናይ እሊ ዐወሊ ወባሰካት እቦም ለአሰብደ ለመድቱ እንዴ ትቤ እግል ትትሃጌ ወእግል ተኣክድ ለለአቀደር ለገብኣ

ታሪካይ መርጀዕ ላኪን ይህለ።

ሰካን ጀዚረት ደህላክ 365 ለገብእ መካዝን ማይ እት ደህላክ ክም ዐለ። ሐቱ ዔል እግል ሐቱ ዮም እብ ከምሰልሁ እግል ሰነት ካምለት እግል ልክደም ክም ሸቀ ሸርሐ። ምናተ ዐደዱ እብ አኪድ ለልትአመር ኢኮን። ክም መሰል እት 17 ክፈል ዘመን አትራክ መሳፍር ኢሸልዩ ሰለቢ። እት ደህላክ ከበር ሌጠ 600 አብያት ክም ዐለ ወክል ምኑ ህይ ነናዩ ባሰካት ክም ዐለ እለን እት ክቱቡ ሸርሐ። ምርት ክፈል ዘመን እንዴ ተኣክረ። እንግሊዝያይ ጄምስ ብሩስ 360 ባሰካት እተ ዐድ ክም ዐለ ከትብ እት ህላ። እት ሰር ዕሰረ ክፈል ዘመን እሰክ ደህላክ ለበጽሐ ፑግሊሲ ህይ እተ ዐድ 70 ባሰካት ክም ዐለ ሸርሐ። ዮም ክል ዐድ ወለ ደመረ መሐደሮታት ደህላክ ምን ልውሕድ 10 መካዝን ማይ እት ድዋራተን ህላ። እት ብዙሕ መሕደሮታትመ ዐደድ መካዝን ማይ። ምን ዐደድ አብያት በዝሕ። እብሊ ልግበእ ወእብ ሎሂ ላኪን ጀዚረት ደህላክ እበ ለህለ እለ

ብዝሐ መካዝን ማይ ወሀለዮት ለልሰቱ ማይ እት ታሪክ እምር እት ገብእ። እት ብዙሕ ናይ ታሪክ ክቱብ ክመ ልትወደሕ። ጀዚረት ደህላክ ዔማት ነዲፍ ማይ ሲቶ ናይ ለትፈናተ ሐዳራት ግንራራብ በሐር ክም ከረ በጸዕ ናይ በሐር ቀዩሕ መሳፍሪን ትጃር እንዴ ገብኣት ከድም ክም ዐለት ልትሀደግ።

እብ አኪድ ክመ ብዝሐ ወዐደደ መካዝን ማይ ጀዚረት ደህላክ። ምን አካን እት አካን ለልትፈናቱ ሸክሉ ወብሰር ሸቅዩቱ መ ልትፈናቱ። ለእብ ብዝሐ ለልትረኩብ ዐወሊ እት ገብእ። እት ለደቀበ ብለቅ ናይ እበን ኖረት (limesone) አርድ ደህላክ እብ ብሰር እንዴ ትወቀረ ለትሐፈራ ቱ። እሊ ሸክል ሰሊንደር ለጽብጥ ዐወሊ እሰክ ሐድ ምርት መትር ሰምጥ ለቡ እት ገብእ። ምን 4 ምትር እሰክ 20 ምትር ቀሪነ ለቡ ቱ። ቀሪናሁ እተ ለትሸቀ እቱ መትወቃል አርድ ለረክዝ ቱ። ለእት ክብ ለቤለ መትወቃል ለህለ አሰክ 20 ምትር ቀሪነ

ዲብ ለህሌ እሉ። ለእት ድሁር አካናት በህለት ምን ተሐት ጠፋሐት በሐር ለህለ ህይ እብ ቅያሱ ሕጭር ለቤለ ቀሪነ ቡ። መብዝሐ ዶል እሊ ቀሪነ እሊ ሐንቱ አርድ ለህለ ማይ እግል ልብጽሐ ሰድዮም። እሊ ዐወሊ እሊ ዝላም እተ ዘልም እቱ ወክድ እብ ውሐዝ። ነዲፍ ለልሰቱ ማይ መልእ። ሰበቡ እትሊ ወክድ እሊ ለጩወ ናይ ሐን አርድ ማይ ምነ ናይ ዝላም ማይ እበ ለቡቱ ሚዛን ገጽ ተሐት ሰበት ለአቀብል። እሊ ዐወሊ እሊ እብ ሰካን ደዋሒ ሳሪ እንዴ ትብህለ ልሰሚ። እት ክለን ዐደታት ወለ ትደመረ መሐድሮታት ደህላክ ህይ እብ ብዝሐ ልትረኩብ። ምናተ ብዙሕ ምን እሊ ዐወሊ እት ክድመት ምንመ ህላ። ሰሩ ላተ እብ ትርበት ደፈኑ። ሰሩመ እምበል ማይ ልትርኤ እምበለ ሐድ ናይ ዝላም ወክድ። ለበዝሐ ክፋል ናይ ሰነት መሊሕ ማይ ሰበት ጽብጥ ለበዝሐ ወክድ ሰካን ጀዚረት ደህላክ እግል እሊ ዐወሊ እሊ እግል ንወዮም ወሕጽቤቶም ለልትነፍዮ እቡ።



ሸባብ

ሕዱግ ሰሌማን



ወለፍ ለልትብህል ሰኔ ልግበእ መእኩይ እግል ሐቲ ሓጀት ምን ዐድድ ወለዐል እብ ንስኣት አው ሸቅየት፣ እት ረዩም ወቅት እምበልህ እግል ትሸቂ ሐቀ ኢቀደርከ ለመጽእ ለመድ ቲ። ወለፍ ራቅበከ ወሰውገከ፣ እግል ምክ ወገሮብከ እንዴ ሓሰረ ህዩ እት ሐንቲሁ ክም ነብር ወዴከ። ምን ናይ ዶሉ መሻክል እግል ትስኪ እት ትብል ለኣቲካሁ ህዩ፣ እት ናይ ዲመ ሐሰር ናዩ ወኣከይ መንበረት ተኣቲ። ወለፍ አሆታይ ወኢፋሎታይ እንዴ እንቤ እት ክልኤ እንከፍሉ። አሆታይ ወለፍ ለልትብህል እት ነፍሰ/ገሮብከ ወለ ሐቲ ተኣሲር ኢለአመጽእ፣ ላኪን ዋጅብከ ላቲ ወእግል ትሸቀዩ ሉብከ ሸቅል እት ወቅቲ ክም ኢተኣተምም ወዴከ። እግል መሰል፣ ወለፍ በርናምጃት ተለፊዞዮን እብ ብዝሐር ርእዩት፣ ፍልም፣ ጌም/ ትልህያ ኮምፒተር እብ ብዝሐር መተልሃይ.....ወብዕድ። እሎም ለሰሚናሆም ሓጃት ለበዘሐው አንፋር ክም ወለፍ ኢልርእዎም፣ ላኪን እት ገሮብከ ናይ ዶሉ ለልትረኤ ተኣሲር ምን ኢለአመጽእመ እት ኣክር ምን መባጽሕነ ሐር በልሱነ ወዓፍየትናመ እግል ልተኣንክፎ ቀድሮ። እግል መሰል መለዐል ሰለአሰ ርቦ ምን ናይ ሐቲ ምዕል ሳዖታት ምሰል ተለፊዞን ለሉሓልፍ ነፍር እብ ከኣፎ ርዶደት እግል ልሸቂ ወምሰል ዓኢለቲ ሰኔት ዕላቀት ወእግል ወላዱ ረሐመት ወፈተ እግል ለሁብ ቀድር? ክም ሸባብ ህዩ ራቲዐት ተርየት እብ ብንዩት እግል ምኒነ ለልንሾ፣ ሐውነ ወሐዋትነ ሰብ ዕያል ሐቀ ገኣነ ህዩ እግል ውላድነ መሰል ሰኔት እግል ንግበእ ለኣሰትህል።

ለካልይ ህዩ ኢፋሎታይ ወለፍ ቱ፣ እሊ ክመ ስሙ ለተኣሸረ ህሌት፣ ዴራይ ወለፍቱ። ክም ከራ፣ ሰጃር፣ ትምባክ፣ ከምረት፣ ሐሺሽ፣ ሺሽ፣ መኸደራት ወለፍ ከናይን ወብዕድ ከምክም። እሎም እተ ተሌ ክቱብ እብ ዝያድ እግል ንሸረሐምቱ፣ ምናተ ወለፍ፣ ምን መባጽሕከ ሐር በልሱ፣ ለኢለኣትሐዚ ጠባዩዕ ጠውር፣ ናይ ገሮብ ወምክ ሕማም



ለአመጽእ፣ ቃጨፎት ወጀራይም ክም በዜሕ ወዴ ወምሰክነ ወዋት ሰብብ። ወለፍ ለበዝሐ ወቅት፣ እብ ጨቅዋ ሰነት፣ በዴሕ ክም ገኣከ እግል ኣርኣዮት፣ ምመሰሊን ወዐባይ አንፋር ወድዉ ዶል ትርኤ፣ ዲብ ዓኢለቶም ወልፋን ነፊር ሐቀ ህለ ወእተ ክምሰልሁ ምን ናይ ዶሉ ጨቅት ወሸቀላት ሕር ወዴ ለልብል ፍክር ሰበት ህላቲ ሸባብ እት ዕምር ንእሾም ለለኣከቡቲ። ልግበእ ደአም ወለፍ ናይለ ገኣ ሓጀት፣ ምን ናይ ዶሉ ጨቅት ለለኣድሕን እንዴ ኢጉበእ እት ናይ ዲመ ዐዛብ፣ ጨቅት፣ ኢረይሐት ዲሚር ንትዕሰ ወከሳር ቲ ለከፊኒ።

ወለፍ ሰጃር ወትንባክ ትንባክ ምን አምኣት ሰናታት እንዴ አንበተት እት ድወል ምውዳቅ ጸሓይ ክም ዓዳት ምንመ ጸንሐት እት 21 ክፈል ዘመን ላኪን፣ ክም ዴራይ፣ ዓፍየት ወዕቅትሳድ እንዴ ገኣት'ቲ ለትትረኤ። ትንባክ እብ ሰለአሰ ገበይ ትዳሌ፣ ክም ሰጃረት፣ ክም ሰፊት፣ ወእብ አንፍ ለልትንሸዕ እንዴ ገኣት ትዳሌ። ሰጃረት ወትንባክ ኣሳሰ ናይለ እግል ንዳፍዎም ለእንቀድር ሕማማት እት ሸባባት ክምተ ኣኪድቱ፣ ለለኣትኣሰፍ ሓጀት ምን ተህሌ ላኪን እተ ለጠወረዩ ድወል ዕልብ ለሰጃር ሰቲ ሻባብ እት ነቅሰ ገይሰ እት ህለ፣ እተ እት ገበይ ተጠውር ለልትረከበ ድወል ክም እርትርዩ ህዩ እት ወሰክ ገይሰ ህለ። ክም ሸባብ ህዩ ምን እሊ ቁትላይ ወለፍ እግል ንትሓፊዝ ወጅቡ። ብሐሳት ክመ ለሐቡሩ እት ሐቲ ሰጃረት ሐድ 2000 ለትፈናተው ቀመማት ክም ህለው ልትሸረሕ። እግል መሰል አግደ ጽብዋ ሰጃረት ወትንባክ፣ ኢሸብሓይ ኣርጋኒክ ኣሲድ፣ ናይትሮጅን፣ ረሲን፣ ክትራመ ለመሰል ሰረጣን ሸንበኣት ለለአመጽእ ሓጀት፣ ሰረጣን ለሰብብ ፖሊ ኒክላር ኣሮማቲኛ ሃይድሮ ካርቦን፣ ኒኮቲን፣ ፊኖል፣ ሕጭረት ትንፋሰ ለለአመጽእ ካርቦን ሞኖ ኦክሳይድ፣ ህያድሮ ሲያኒክ ኣሲድ ውበዕዳም አምኣት ቀመማት ጽብዋ። እሎም ለሰሚናሆም ሓጃት ሰሮም እት፣ አፍ፣ ኣንፍ፣ ሕልቅም፣ ላዓላይ ክፋል ናይ ሰርዐት ኣተንፈሶት

ወለፍ፣ ወመደረቲ



እንዴ ሰቲ ተርፍ ወሰሮም እት ሸንበኣት ልትኣከብ። እግል መሰል ኒኮቲን ምን እት ሰጃረት ወትንባክ እብ ብዝሐ ለልትረከብ ቀመምቲ፣ ከህቲ ለሰብቡ መሻክል ምን እንረኤ፣ ጨቅዋ ደም ክም ወሰክ ወዴ፣ ሀንደገት ልብ ትወሰክ፣ አሰዕድ ልብ ምን ቅድረቲ ወለዐል ልጨቀም ወኣሳራር ደም ጽብብ። ካርቦንሞኖኦክሳይድ ህዩ፣ ኦክስጅን እት ክለ ነፍሰነ እግል ኢልብጸሕ እብ ክርዐት ወቂዕ ናይ ለገኣ ክፋል ገሮብ እግል ልሰብብ ቀድር።

ትንባክ ወሰጃር ለሰቲ አንፋር እብ 10% ዝያድ ምን ኢሰቲ አንፋር እብ ሰረጣን እግል ልደመዖ በክት ህለ ወርክሰ ከርሸት ወምዓይት ኣጊድ ጠውር። እት ወቅት ዕምሰነ ሰጃር ለሰትዩ እማት እግለን ሌጠ እንዴ ኢጉበእ እግለ እት ክብደን ለህለ ዋፍልመ ክም ደራሁ እግል ለአምረ ወጅብ። ምን ሰጃር ለሰትዩ እማት ለልትወለዶ አጥፋል ሚዞኖም ኣሰክ እብ ሐድ 170 ግራም ነቅሰ ወኣሰክ እት ክብድ እምም እት ህለው እግል ሊሞቶ ዐቢ በክት ህለ። ሰበት እሊ ክም ሸባብ መፍርየት ወሰኣየት እግል ዓኢለትነ፣ መጅተመዕነ ወዐድነ እግል ንግበእ ገኣነ ምን ጉብእ፣ ምን ዴረት ወለፍ፣ ነፍሰነ እግል ንክረዕ፣ ጠባይዕነ ንቀይር ወሳዳይት ወምክር ኤምረት ንሕዜ ብከ።

ሰቲ ከምረት፣ እትሊ ወቅት እሊ ሰቲ ከምረት ክም ወለፍ ሌጠ እንዴ ኢጉበእ ክም ሕማም ለልርእዩ ደወልመ ህለዩ። እብ ሰበት እሊ ወለፍ እሊ ህዩ እት ነፍሶም ወኣኢለቶም በደለ ለኣለበ ከሳር ለወደው አንፋር ወሸባብ ብዝሓም ቶም። ከምረት ኣሳሰ ለኢለኣትሐዚ ዕምሰነ፣ ኣሳሰ ሰርቅ፣ ኣሳሰ ጀሪመት፣ ካሳር ማል፣ ሐድሰ ዐርባት ወኣሳሰ ናይ እብ ጅመዕ ለለዐዴ አምራድ'ተ። ኢታናኦል ለልትብህል እት ሰው፣ ኣረቂ፣ ቢረ፣ ነቢት፣ ዊሰክ ወጅን ለልትረከብ ቀመም ምን እንሰትዩ እት ሕምስ ደቂቀት እንዴ አንበተት እት ደምነ ዘውር። እግል ከርሸትነ፣ ኣምዓይትነ

ልብከ ውበዕድ ክፋላት ገሮብከ ህዩ ሸቅሎም እብ ዋጅብ ክም ኢሸቂ ወድዮም። ክምረት ለሰተ ነፊር፣ እኩይ ልትሃጌ ልትብኣሰ፣ ደንዝዝ ወእንዴ ፈክረ እግል ልሕሰብ ኢቀድር። ሰቲ ከረት ክም ሕማም ክብደት፣ ሰረጣን ክብደት፣ ሕዲነ ደም፣ ርክሰ አምዓይት ወክርሸት ወእተ ክምሰልሁ ህዩ ሕማም ኣረ እግል ልሰብብ ለቀድር ዴራይ ሕማም ቲ።

እት ኣክር፣ ሸባብ ዓጸት ምጅተመዕ ሰበት ገበኣነ፣ ገሮብ እብ ርዶደት ለትብከ፣ ዑፋይ ሕር ምንለ

ገኣ ወለፍ ወሕማም፣ እጅትማዕዩት ሰኔት፣ ፍክር ራቲዕ ወሰሊም፣ ደሚር ርዮሕ ወሰምዒት ራትዐት እብ ብንዩት፣ ሕሳል ደሐን እግል ነፍሰነ ወምጅተመዕነ ንዋሌ። ሰበቡ እግል ርሐ ምን ለገኣ ወለፍ ሕር ለኢገኣ ሻብ፣ እግል ኣሮ እግል ልግበእ ወልሰዴ ኢቀድር፣ ምን እኩይ ወለፍ ለትነጀ ሻብ ህዩ እግል ክሉ ገቢል ፋትሰ ሰኔት ሰኣየት ጉብእ። ወለፍ መደረቲ እንዴ ኣመርነ ንትነጃ ምኑ ሰበቡ ወለፍ፣ ቀይድ ዐቦት ወተጠውር ሸባብ ሰበት ጉብኣ።

ኢንሰታግራም

ኢንሰታግራም ናይ ሞባይል ወትምፒተር ሶፍትዌር አው ኣፕሊኬሽን እት ጉብእ፣ እብ ሰወር ወሺድዮ ለተለ ርሳላት እት ዎሮ ልግበእ መብዝሓም አንፋር እግል ልኣክት ነፊዕ ወእት እንተርኔት



ዐባይ ክብቲ እት ረክብ መጽእ ለህለ ዎሮ ምን መሻቀዩ ሸባባት ሐብፊቲ። ገሌ ምን መፍፍዕትቲ ምን እንረኤ፣ እብ ኢንሰታግራም እንዴ ወዴከ ምሰለ ቀደም ኣዚ መልሂትክ እግል ልግበኣ ለሰመሐክ እሎም አንፋር እግል ትትሃጀክ፣ ሰወር ወሺድዮ እግል ትንደእ ትቀድር።

ኢንሰታግራም እት ሰነት 2010 እብ ኪሸን ሲስትሮም ወማይክ ክፊገርን ለትብህለው አምሪክዩን ለትመሀ ቲ። እተ እያመ አውሉ ኢንሰታግራም ኣይ ኦ ኤሰ ለልትብህል ኣፕረይቲን ሲስተም ለዐለ እግለን ሞባይለት ሌጣቲ ክድመት ለህይብ ለዐለ። እት ወፊሕ ኣርበዕ ናይ ሰነት 2012 እተ አንድሮይድ ሲስተም ለበን ሞባይላት እግል ልሸቂ ኣንበተ። እተ ክምሰልህመ እት ኖሰ ለሰነት እት ዌብሳይት ኢንሰታግራም ክድመት እግል ለሁብ ኣንበተ።

እትሊ ወቅት እሊ፣ ኢንሳግራም እት ሐንቴ ምልክ ፈይሰቡክ እት ጉብእ፣ እብ 33 ሀገጊት ክድመት ለህይብ። እሊ ሌጠ እንዴ ኢጉበእ፣ እትሊ ወቅት እሊ እብ ኢንሰታግራም እንዴ ወዴከ ለሐዚካሁ ቅያሰ ናይ ሺድዮ እግል ትልኣክ ትቀድር። እብ ኢንሰታግራም እንዴ ወዴከ ምሰል ለገኣ ነፊር እግል ትትሃጀክ ለልትቀድር ምንማቲ ምሰል መሴንጀር ወዋትሰ-ኣፕ ዶል ተኣጃግሩ ላኪን ድዕፍ ለበላቲ። እሊ ምን ልትኣሰሰ እንዴ ኣንበተ ብዝሓም ዘባይን እት ረክብ ገይሰ ለህለ ኢንሰታግራም፣ እተ አውላዎም 2 ኣዋፊሕ ሌጠ ሐድ ክልኤ ሚልዮን መትነፊዐት ወደ።

እትሊ ወቅት እሊ ኢንሰታግራም ሐድ 700 ሚልዮን መትነፊዐት ለቡ መሻቀዩ ሸበክት ሐብፊ እት ጉብእ፣ ሐድ 40 ሚልዮን ሰወር ራፍዕ ህለ። ወ375 ሚልዮን ህጅክ እብ ኢንሰታግራም ክም ትቀደመ ወሳይቁ ለኣክዶ። እሊ ለእት ሰነት 2012 እብ 1 ቢልዮን ዶላር ዲብ ፈይሰቡክ ለትዘበ ኢንሰታግራም እትሊ ወቅት እሊ፣ ዎሮ ምን እሙራም ውበዝሕ ኣዳም ለልትነፊዕ እቡ፣ ዎሮ ምን መሻቀዩ ሸበካት መሕበራይ እጅትማዕዩት ጋብእ ህለ።

እብ መክበር ወመን ሸባባት ወደሰሰ ኢዳክፍ? ለትትዳሌ ሰጅሐት

ልግብ

እት ሒን ቀይም ሐቲ ምዕል እት ወክድ ኣዳሕየት፡ ምሮት ታጅር ሸነጥ ምን ጩወት ምሉእ እንዲ ሳደደዩ እት ኣድጉ እንዲ ጸዕነዩ እግል ለአዝብዩ ኣሰክ ዕዳገ ትበገሰ እቡ። ለእናስ ወለ ኣድጉ ኣሰር ሕድ እት ገበኦ መሳፊት ሰኒ ረደም ኣሴረረው። ኣሰክ እለ ለገበዮም ብዙሕ እንዲ ኢጣይም እት ሰኩቶም መሓዝ ትከበትዮም። በክት ሰበት ኢወደው ለኣድግ እንዲ ተዐንቀፈ እት ማይ ኣግሐመ፡ ከምን ምግሓሙ እብ ብጣሩ ዶል ገብኦ እለ ኢኮን ለጽዕነት ናይለ ሸነጥ ለእት መቅጠኑ ዐለት ምን ዶል እት ዶል ትቀልል እቲ ክም ህሌት ልብ ከረ እት።

ለታጅር ህዩ ለእለ ወዲ ሐቲመ ሰበት ይዐለት እሉ፡ ዐድ እንዲ ኣቅበለ ለኣድጉ ምን ሐዲስ ሸነጥ ምን ጩወት ሙሉእ ግል ልጽዐት ሰበት ዐለት እሉ፡ እት ከብክቡ እብ ኣሰሩ ኣሰክ ዐዱ ዐቅበለ። ከምን ሐዲስ ጩወቱ እንዲ ጸዕነ ኣድጉ እት ጌልል እት መሓዝ ክም በጽሐ ለኣድጉ ህዩ እለ ዶል እለ እብ እማመት እት ማይ እንዲ ኣንገርገረ እግለ ጩወት እብ ከማለ እት ማይ መየሰዩ፡ ከኣዜመ መቅጠኑ ቀለል ወፋዲ ዲብ እንቲ እብ ብጣሩ ገብኦ።

ለታጅር እለ ውዲትለ ኣድጉ ወለ ኣከይለ ድሱ እት ዶሉ ፈሀመዩ፡ ወእብላሁ ኣዜመ እግል ካልእ ዶል ኣሰክ ዐድ ዐቅበለ፡ ወእግለ ኣድጉ እለ ዶል እለ ምን እስፖንጅ ለትመልኦ ሸነጥ ጸዕነዩ።

እለ በዐል ኣከይ ድስ ኣድግ ኣዜመ እለ ጸሩ ራፊዕ እት እንቲ እት መሓዝ ክም በጽሐ፡ ክመ እት እዩዱ ምስል ጸሩ ወኖሱ እት ማይ ኣንገርገረ፡ ምናተ እብጣሩ ክም ገብኦ ለጸሩ ሕኔት ቀልል እሉ ሰኒ ወእማን ሰበት ከብደ እቲ ለዓጻቲ እት ትትከነዕ እቲ እሕ እት ልብል ገበዩ ኣንበተ።

ለታጅር ህዩ እት ልትሰሐቅ እቲ፡ እንተ ኣድግ ግሉል እንተ፡ ለኣከይለ ድስክ ግድም እሙር እትከ ህለ፡ ወእግል ተኣምረ ለብእትኩ እሎም ለርሐም ምን ብዕዳም ወለዐል ዓቅላም ትመስል እቶም፡ ሐት-ሐቲ ዶል ርሐም ሌጣ ተ ለእለ ደር” ቤለዩ። ወሞረ እንዲ ሰደዩ ኣሰክለ ሱግ ጌለለዩ። ከኢገበዩ ለለሐሰብ እት ደንገበ ኖሱ ልትፈደዩ።

ተርጀመት መሰል

“ላብብ ናይ ሰነቱ ለህምም፡ ውግሉል ናይ ዮሙ ከድም።”

እለ መሰል እብ ሓጫር ገበይ ፍንጌ ልባብ ወመግለል ለህለ ፈርግ ትሸፊሕ እግልኩ፡ በህለት ላብብ ክል ዶል ምን ህለ እቲ ተየልል ወኬን ረዩም ለለኦቃምት ገብእ እት ህለ፡ ግሉል ሐንለ እገሩ ሌጠ ልርኡ፡ እለ ህዩ ለህለ እቲ ተየልል ኣክል ሕድ እንዲ ቀርኡ፡ ኣሰባብ ወፍገሪት እት ክምስልሁ እንዲ ዋገመ እት ሓለት ይሰርት ህለ ምን ገብኦ፡ ፈጅር ተየልል ብዕድ ክም መጽእ እንዲ ፈሀመ ሓሪቱ እት ወግም ለለኣቱ፡ ወእት እኪት ሓለት ህለ ምን ገብኦመ እዴሁ እግለ እንዲ ኢሊህይብ እብ ሱብር ወሰእየት ገበዩ ለለኦተላሌ ነፈር ለብብ ቲ። ግሉል ህዩ ትየሰረት እሉ ምን ገብኦ ሐሪቱ ለኢለሐሰብ፡ ወትኬለመት ምን ገብኦመ ሰእየት ለኢወዲ ወለዝሩፍ ፈጅሪታ እግል ትትበደል ክም ትቀድር ለኢልፍህም፡ ወመሻክሉ እንዲ ዋገመ እግል ልበድሉ ዓቅል ምስዳራት ለኢነሰእቲ። ከምመሰላይ እለ ውበዕድ እት ወግም እንዲ ኣታ ቲ “ላብብ ናይ ሰነቱ ለህምም፡ ውግሉል ናይ ዮሙ ከድም።” ልብለነ ለህለ።

በህል እ'ሙራም

- “ለዲበ ህሌክ ሓለት ክርበት እግል ትበድል ሐቆ ትሸነህኩ እት ሰልፍ ለዲቡ ህሌክ ዝኩብ በድል።” (ኣቡል ፈረጅ ብኒ ኣልጃዚ)
- “ሕኔት እግል ክሉ ለበሊስ ነኣምር፡ ገሌ ኣሰእለት እበ ምን ንትሰኣል ልትፈደል።” (ጄምስ ሶርበር)
- “መዕነት ናይ ለውቀት፡ እንተ ሰሕቅ እት ወዲ ክም ትሰክብ ወሰሕቅ እት ትብል ክም ትፈዚዕ ለወዲክ ነፈር ዶል ለህሌ እግልካቲ፡ ወፍንጌ ክልኢትን ለሰሕቅ ህዩ ቀልብ ፋሬሕ ወለኢትትወሰፍ ራሐት ዶል ትረክብ ቲ።” (ነዛር ቀባኑ)
- “ኣሰክ እለ ርሕዩ ኣሰርለ ሐቆ እለ ኣህምየት እግል ተህሌ እሎም ለኢቀድሮ ጋራት እት ገብእ ወእቶም እት ትትኣሰፍ እጽብጠ ህሌኩ።” (ኮርት ፎኔጅት)
- “ገበይ ልባብ በህለት፡ እት ጌገ እግል ኢትትከሬ እንዲ ትቤ ዶል ኢትፈርህ ቲ።” (ባውሎ ኮይሎ)

ጠዓም

ትም ለቤለ ክሉ ሐለት በሊስ ኣለቡ በህለት ኢኮን። ገሌ ብዕዳም እግል ኢለኦምጽጽ እንዲ ቤለው ለአዝጦ፡ ወገሌ ሰኒ ሰበት መጸው ለሂገ መጸጸቶም እግል ኢትወሰክ እቶም እንዲ ቤለው ቲ ለለአዝጦ፡ ወገሌህምም ተሃገው ምን ገብኦ ለሂገ ክም ኢትነፊዕ ሰበት ፈሀመውቲ ለለአዝጦ፡ ወገሌ ህዩ ዶል ሐሩቀቶም ለአዝጦ፡ እለ ህዩ ምሮትመ እግል ልክሰር ሰበት ኢለሐዙ ቲ፡ ወምን ክሉ ለሔሰ ኣዚም ህዩ ትም ለእንተ ትወድያተ።

ዝበድ ዘየታት

ለኣዳም ሂገ ፈቲ ወኣነ ህዩ ርሕዩ ዞዕ ብዙሕ ተኣቤ እቲ። ክል ዶል ምስል ነፍሼ እብ ነፍሼ እት ህድግ ኣነብት፡ ምናተ እትለ በዝሐ ወቅት ለዛየታቲ ምን ከፍፍርዬ ፈገር ኣቤ እቲ።

በህል

- መውሀበት መን ኣመረ እት ትልህዩ ምን ክሎም ወለዐል ተዐውተክ ትገብኦ፡ ምናተ ወቀይ እብ ሕበር ወዝያደት ዐቅል ላተ ፋርስ ወዲኩ።
- ዶል ለርሕክ እግል ብዕዳም ትሰበላት፡ እንተ ምን እለ ሀብክ ወለዐል እግል ትንሰእ ቲ።
- ሽምዐት ዶል እንሸቆ ሕነ እት ሓዚ በርሀት ብጉሳም ህሌኩ ወክታብ ዶል እንቀርእ ህዩ እት ሓዚ ዐቅል ብጉሳም ህሌኩ።
- ለመጅተመዕ ለኣንፋሩ ኣሰክ ዝቤ ኣክትብት ልትባደር ላዝም ምለዐለ ምጅተመዕ ለኣፍራዱ እግል ዝቤ ሞባይላት ልትባደር እግል ልግበኦ።
- ክልኦት ነፈር ለእለ ወዲክ ክሉ ረኣሰክ እግለ ተኣትመሳምስ እሎም ኣለብኩ፡ ሰኒ ለለኣምረክ መልሀይኩ ወካጅል እት እንተ እግል ልርኡክ ለልታኬ ዐደኩ።
- እንተ ኣሰክ እለ እብ ሓያትክ ክም ህሌክ እግል ልምሰል እትከ ገብኦ ምን ገብኦ፡ ቅሩባይለ እንተ ልወቅ ክም ህሌክ ለለሸዕረክ ለገብኦ ልግበኦ ነፈር ግበኦ።

መዕሉመት

ለእሙር ምመሰላይ ብርሰሌ ሐረኩቲ ሰኒ ሻፍገት ነብረት፡ ከኡብለ ምስምስ እት ገሌ ምን ናይ ኣፍላም ሰውሩ ለመተቅብላይ ኣክል ሕድ እግል ልታብዑ ለሐረኩቲ እንዲ ኣብረደው ሰጁለ ዐለው።

ናይ መፋህመት ቅድረትክ እብ ከፎ ተኣትሓይሰ?

እት ኣትሓየሶት ቅድረት መትፋሃም ምስል ብዕዳም፡ ናይ ከርስክ እንፍዓላት ኣክል ሕድ ኣመሮት ለሰልፋይት ከጥወት ኣሰክ ኣትሓየሶት ቅድረት መፋህመት ቲ።


መስኦልየት ናይለ ናይ ኖስክ ጠባዩዕ እግል ትትሐመል ለኣትሐዜኩ። ገሌ ሓሳስ ላቲ ሕክም ኣውመ ከለጥ እት ሳድፍ እቲ ወቅት፡ ኢትጽበጦ እቲ ኣነ ከለጥኮ ወኣዜ ሳምሐኒ እግል ቲበል ሐር-ሐር ኢትውዲ።

ለእምበል ዘየታት ትወድዩ (እብ ሂገ ገርብ) መፋህመት ኣህምየቲ ኣክለ እብ ዘየታት ለትወድዩ መፋህመት ቲ፡ ኣህታይት ናይ ገርብ ሂገ እት ምስል ብዕዳም ለትወድዩ ህድግ ኣካነተ ሰኒ ዐባይ ቲ፡ እት ምስል ብዕዳም ለትወድዩ መፋህመት ቅድረትክ እግል ተኣትሓይሰ ተሐዜ ሐቆ ገብኣኩ፡ እት ሰልፍ ፈዳብ መተንሰያይ እግል ትግበኦ ለኣትሐዜኩ።

ለኣህታይ ጠባዩዕ ናይ ሸክሰየትክ እትለ ትወቀለት ደረጃቲ እንዲ ኣብጸሕካህ፡ እት ምስል ብዕዳም ለትወድዩ መፋህመት ኣክል ሕድ ትነፈዕ እቡ። ቅድረት መፋህመት ለተግቤ እበ ገበይ እግል ትትዐለም ሐቆ ሐዜኩ፡ ለሔሰት ናይ መፋህመት ቅድረት ኣተንሰየት እግል ትጠውር ለኣትሐዜኩ።

ነሰኦ ቀራር ወፈሃዐት ኖሱ፡ እግለ መቅድረት መፋህመትክ ምስል ብዕዳም እግል ተኣትሓይሰ ለህሌት እግልክ ሸንህት እት ኣማን እግል ልበድላቲ።

“ሕነ ክል ዶል ሳምሐት ምን ዕቃብ ክም ልትፈደል ንትረሰዑ” ወላድ ኣደሚ ክል ዶል ቀልጦ፡ ሕናመ እግል ንቅለጥ መስሙሕ እግልና ቲ፡ ምናተ ምሮት ከእብ ጠብዑ ሰበት ቲ፡ ሕነ እት ቀበት እለ ሕበርበር ጣባዩዕ እለ ለነህይቡ ገበዩ ለሳርር ረድ ፍዕል እግል ክል ዶል ቀይድ ገብኦ እግልኩ።



ምሮት ነፈር እት ሐኪም እንዲ ጌሰ ከብዱ ተኣመጥጡ ክም ህሌት ሸርሐ እሉ፡ ለሐኪም ህዩ ሚ ባሌዕ ዐልክ? እት ልብል ትሰእለዩ። ህቲ ህዩ ሕበዘት ሓረት በልዐኮ ዶል ቤለዩ፡ ለሐኪም ህዩ፡ መክሐለት ወሚለል እንዲ ነሰኦ ነዐ በል እብል ትገሌ እዩ ቤለዩ እግል ልክሐሉ። ለእናስ ህዩ፡ ኣነ ምን መጢጠት ከብድ ቲ ለእጠሬዕ ህሌኩ እንዲኢኮን ዕንታቲ ሚ ዶል ሓመሚኒ?! ቤለዩ። ለሐኪም ህዩ፡ ኣምር ህሌኩ፡ ምናተ ሓረት ሕበዘት እንዲ ፈረግክ እግል ኢትብለዐ ምን እቤቲ ቤለዩ።

ምን ገጽ 3 ለተላለ

ድርሆይ

ለወክድ ድርሆይ ወሸሂድ ዑስማን ለዐፍሽ እግል ልዕቀቦ ኣብጀማል ወኡብካልድ ህዩ እግለ ሴርቀት ዲብ ጌሉሎም ኣሰክ ቦሊስ ለኣብጸሐዎም እቲ ወክድ ዮም ሐቆ ዝያድ ዕሰረ ሰነት ሄራር ለዲብ ሻሬዕ ሳሕል ከረን ለህለ በረንዳት ክምስል ረኣቲ እት ዝክርያቲ ትቅብ ለቤለ እሉ። ሸሂድ ዑስማን ጅንዲ ትሰዒን ምንመ ዐለ፡ ኣሰልፍ ትሳረሐ ወዲብ ዐሊግድር ኣካን ገርሀት ሐርስ ክምስል ነሰኦ፡ ዲብ ሰነት 1998 ወራር ወያኔ ክምስል ቀንጸ ምን ሐዲስ ዲብ ጄሽ ኣቅበለ። ዲብ መደት ካልኣይ ወራር ህዩ ህቲ ወሐሁ ሐመድኖር ዲብ ጀብህት መረብ ሱቲት እት ልትሓረቦ እብ ተርተረት ኣስተሸተሀደው።

ድርሆይ ለዐለት ምስሉ ሰላዲ እብ ኣቶቡስ ኣሰክ ነቅፈ ካፍየት ምንመ ዐለት፡ እት ሒን ከረም ገበይ ከረን ነቅፈ ሰበት ትደበኦ፡ እብ ዐረባት ሸሕነት ወኣይሱዙታት እግል ልሳፍር፡

ላኪን ምእት ነቅፈ ምን ኣፍዐበት ክምስል ኢተሓልፋ ሸክ ይዐለ እሉ። ክምስል ኣመሉ ህዩ “ኣለ ፈራጅ” እንዲ ቤላቲ ፈጅራተ እሰቡሕ እግል ልሳፍር ኣምም ለዐለ። ለዲብ ሰነት 91 ወ95 ለበልሰዩ ዝክርያቲ እት ለኣዳውር ህዩ ኣመቅረቡ ወኣልዕሻሁ ዲብ ጃምዕ ኣሰሓበ እንዲ ትሰለ ኣሰክለ ዐራት ለኣሰር እግሎም ለወዐለ ዐድ ሳልሕ ኣቅበለ። እግልሚ ምያየቲ ምስሎም ሰበት ዐለት። ኣሰኩም እት ለኣቀብል ህዩ እብ ልቡ “ረቢ ልባርኮም እሎም ዐድ እሎም፡ ነብረ፡ ነወል ኣሰክ ኣፍዐበት ወምያየት ዮም ላሊ ምን ከርዐው እዩ” እት ልብል ኣሰኩም ተከሸ ቤለ። ፈጅራተ ዶል እዛን እሰቡሕ ህዩ ለኢትከለሰ ሰፈሩ እግል ለኣተላሌ፡ ኣሰክ መውገፍ ኣፍዐበት እግል ለኣተጅህቲ። ድርሆይ ሐቆ ኣፍዐበት ህዩ? ነቅፈ እብ ሚ ነወል እግል ልብጸሕቲ ገብኦ? ኣላሁ ዓልም.....።


ትተላሌ.....



ሽዑብ ኤስኪሞ ወዓዳቱ




ሽዑብ ኤስኪሞ እት ቅብለታይ ገሉብ ምድር-ቡሩድ እዲነ ነብሮ። ህቶም እት ምን ሳይቤርያ (ሩሲያ)



አስክ አላስክ (ቅብለት አሜሪካ ወከናደ) ወጀዚረት ግሪንላንድ ለሀላ አራዲ በረድ ነብሮ። ኤስኪሞ ክልኤ ቀቢለት ከምክሞ። ህተን ህዩ እት አላስክ ወግሪንላንድ ለህሌት ቀቢለት ኢንዊት ወዲብ ሳይቤርያ ለህሌት ቀቢለት ዩፒክ ቶም።

ናይ ክልኤቶም ዓዳት ለናስኦት ክም ሳልሳይት ንኢሽ ቀቢለትም ህሌት፡ ኤለዩት ህዩ ልቡሉ። ምስል ኢንዊት ወዩፒክ ህዩ ልትሞለዶ ምናተ ሰኒ ሐዳም ቶም። ህግያሆም ክምሰሌሆም ተ።

ህግዩ ኤስኪሞ ዩፒክ እት ገብኡ፡ ሕኩመት ግሪንላንድ ወከናደ እት መካትብ ልትነፈዐ እብ፡ ሰበቡ ህዩ እግሉም እግል ልክሰቦ እንዴ ቤለው ተ። ቀባይል ኤስኪሞ፡



አርበዕ ሀገሊት ልትሃጌ።

ሽዑብ ኤስኪሞ እብ ዓመት ምድሮም በረድ ሰበት ተ። መናበረቶም ምስል ንዕዮ ወጀለቦት ዓስ ትትጸበጥ። ሐዳም ምኖም ለሐርሶ።

እሎም ዓስ ለጀልቦ፡ ምን ነኣይሽ ዓሳታት፡ አስክለ ዐባዩ ሐት አው ዓስ ኔብራይ እንዴ ቀትለው፡ ሸቤሕ ለብእተ ነብረ ልትመወኖ። ሙብዝሐ ለልትነዐው ሐዋን ከደን ህዩ፡ ካሪቡ ለልትብህል አክል ነለት ለገብእ አጣል ከደን ተ።

እት ምድር ኤስኪሞ በህለት ቅብለታይ ገሉብ ለሐረድካህ ሐዋን እግል አምዕሉታት ብዞሕ ለአበለዐክ፡ ሰበቡ ህዩ ለነብረ



እት በረድ ሰበት ደፋነ ከከርው፡ ኢትመሸምሸ ወኢትኣኬ። ቀደም ሰስ ወሬሕ ለከዘንካህ ሰገ እበ

አካኑ ጸንሐከ ወተኣፈግር ወትበሌዕ።

እሊ ሽዑብ እሊ፡ ምን ተዋብ አክላብ ሌጠ ተውቦ። ሰበቡ ህዩ፡ ካሪስ ዐፍሾም ለደንኮ እቡ፡ እት በረድ እብ አክላብ ልትሰሐብ። እምበልሁም እበ አክላብም ንዕዮ ገይሶ ወለልሐዝዉ ሐዋን ቀትሎ ከመጽኦ። እት ለዋው ምሒጣት ሰበት ህለው ህዩ፡ ሐብሐር፡ ሻርክ፡ ሳልሞን፡ ቱና፡ ዴራክ፡ ሐት ወአቡሰላም ለመሰል ዓሳታት እሉ ጀልቦ።

ቤት ኤስኪሞ ኢግሉ ልቡሉ፡ ምን በረድ ህዩ ትትሸቁ። ለሞብ ምን በረድ እንዴ ጸርበው በንው። ወዲብ ቀበተ ሰክኖ። ገሌሆም ከህረብት ልትነፍዶ እት ህለው፡ ገሌሆም ህዩ ምን ሸቤሕ ኔብራይ ዓስ ለምበት ፍንቲት ሸቁ ወእለ ለአበርሆ።

ኤስኪሞ ልባሶም ምን ቃቱሉ ሐዋናት ቅራብ እት ገብኡ፡ ትሩድ ወጅውቱ ጭገር ለብእቱ ተ። እሊ ህዩ ምን ብርድ ከሬዕ እሎም። ብዕድ ምስለ በረድ ለትገልበበ ምድሮም ለገይሰ ጅቡብ ጨጋራታትም ለብሶ። ህቶም ውብርድ ዲመ ምስል ነብሮ። ምድሮም ጸኣይ እንዴ ኢልርኤ ሰስ ወሬሕ ለልኦደውር እቱ አውካድ ሰንትመ ሀለ።

ገሌሆም ህዩ አክሬዕ ምን ሐጺን እንዴ ዋተደው፡ ዐርቀይ ሸቁ ወዲብለ ረኣሰለ ዐርቀይ

ቤት ምን ዕጩይ አውሙ፡ ጦብ ወትነጅ እግል ልሸቀው ቀድሮ። ክእን ለልኦደዮም ህዩ ምን በረድ ለዐል እግል ልርፍዕው ምን ሐዘው ተ።

ህዳይ ዲብ መጅተመዕ ኤስኪሞ እብ ፍቲ ወምራድ እንዴ ኢገብኡ፡ እናስ ታምም ወእንዴ ትነዐ ዐድ ለልኦነበር ሐቆ መስለ እቶም፡ ወለቶም ለሀዩቡ። ለዓይለት ክም ተሃዴት፡ ዎሮትክ እብ ርዝቁ ሰበት ለዐይር፡ ለህዳይ ላዝም ገብኡ፡ ሰበቡ ለነብር እቱ ምድር፡ ምስል እንዴ ሸቁክ ለትነብሩ ምድር ድኢኮን፡ እብ በይንክ ለልትነበር ምድር ኢኮን።

ደያሪዩ



ከአፎ አስመንኪ ድያሪዩ። ማሌ እት ኮምብሽታቶ ረኤኮኪ፡ ጃኬት ገናዲት ካርየት ዲብኪ ዐልኪ። ደሐንኪ ቱ ማሚ? ሕምት እግል ኢትዐሊ ፈርሀኮ። ለምድርመ ገነፍእ ብዲቡ።

ደሐንቱ ትብይ። ከደሐን ሊደዩ ድያሪዩ። እነ ላቱ ደሐን ህሊኮ ሐቆ ቴልኪኒ ትረይሐኮ ኢኮን። እንቲ ኢትሕመሚ በስ። ሰበቡ ህዩ

ግንፈእመ ትተረድ ዲብኪ። ከድያሪዩ፡ ማሌ ዋድየተ ለዐልኪ ጃኬት፡ አስክ ወሬሕ ዲሰምበር ምን መቅጠንኪ ኢትክረዩ፡ ምድር ከበሰ እትሊ ወክድ ጎነ ብርዱ ድቁብ ተ። ወምን ብርድ ለበይአክ ረጠባት፡ ገነፍእ ወአስክ ኒሞንዩ (ናይ ሸነብእ) እንተነሃባት እግል ልጽበጠነ ቀድር።

ብርድ ህዩ፡ እብ ብልዐት ነበሪት ሕፋን ወቅዘእ ለቡ፡ ክምስልሁም እብ ልባስ ድሮዕ ቱ ለእንካፍሐ። ብዕድ ደወ በታተን አለቡ። እምበልሁም መዲደት፡ ሻሂ፡ ቡን፡ ሐሊብ ሕፋን ወሸቢቅ ሱቴኪ ወበልዐኪ ምን ገብኡ፡ ኩሉ ረኣሱ ገነፍእ ወእንቲ ክልኤ ገበይ። ከግድም ተረዲ፡ እትሊ አሌላት ጎነ፡ ልባስ ኢትአክፍሬ ወነብረ ኢትአውሕዲ።

ለዘት ሽዕር

ገሌሁ አዳም በኬ እስኢን ዶል ለሐግል ጨጭ ልብል ለአዳሙ እግል ልሸቅል ሸኬ ወበኬ ክም ገብእዩ እብ ተኣሰትህል ልውዴ ወጸራጽር ወአፍሁ ትም ኢልብል። ላኪን ኢረኣ በትራይ ለእግር አለቡ ህቱመ ልሄርር እብ ንዩቱ ወቀልቡ ምን ሐበት ኢልውዕል ኩለ ለዋጅቡ ወኢረኣ አዳም ለፋግር መስከቡ እት ቅርሲስ ወእኪይ እት ከረቡ

ክልኤ እግር እበን ልሰዴ ወበጼሕ ሃይቡ አፎ ካልቁ ኢለሐምድ፡ እሊ ለእስኢን አለቡ።

ኣድሳ አሰመረ

ምን ዐጃይብ ዐዋዲ

እት እዲነ ገሌ ንብሩይ አው እኩይ ዐዋዲ ትርኢ። መሰለን እት መጅተመዕ ትግሬ እሳት ዶል ትረምቀም፡ “ሕነ ዮም እሳት ኢነህይቤ አምዕል ስርዕናተ!” ለበልሶ እትክ ኢልትሐገሎ። ከዲብ ክል ምጅተመዕ ዐለም ኦሮትክ ናዩ ለመድ ህለ እሉ። ከእለን መሰል ንርኢ፡

ግሪክ፡ መትጣፍኦት እት መርዓት


እት ግሪክ (ዩናን) መርዓት እት ዳስ ህዳዩ ዶል ተኣቱ፡ ኩሎም ውላድ ወአዋልድ ጠፍኦ ዲቡ። እለ ዋፍኦት እለ ላኪን፡ “በክት ሰኒ ወህዳይ በኪት ሊደዩ እኪ ወምን ሸዋጢን ልሕጀበኪ” ለበህለት ተ። እምበልሁም ጅኔታይ ዶል ልትወለድ እለ ዓዳት ጠፍኦ ወድወ ዲቡ።

እሊ ምስል ዓዳትናመ ገሌ መትጸባዋ ለቡ መስል። እግልሚ ዲብ ዓዳት ትግሬ መርዓት ዶል ለእለ ትሰምድተ። ንኡሻይ ጅነ ዋፈኦት እንዴ ኢተገብኡ፡ አፋሁ ሐሊብ እንዴ መልኦ በርጭቅ እተ። እለ ብርጫቀት ሐሊብ ህዩ እግል ፋል ሰኒ ለትገብእ ዓደት ተ።

ሩሰዩ፡ ዲሰምበር 12 አምዕል ዕምሰነ እብ ሽዑብ ሩሰዩ፡ ዮም 12 ዲሰምበር አምዕል ዕምሰነ እንዴ ትበህለት ልትአመን እበ ነብረ ወሀሌ። እለ ህዩ ምን ኣብዕቦታቶም ለጸንሐቶም ዓደት እት ገብኡ፡ ምኖም እት ሕኩመቶም ዐደወ።

እት ሩሰዩ ዐደድ ሰብ እት ልውሐድ ወዐደድ አንሳት እት በኪሕ ክም መጽኦ፡ ውላድ ለአለም ሰብ ዐቅድ፡ እግል ሊለዶ ልትሰጅዶ። እት ሕኩመት ሸቁ ገብአው ምን ገብኡ፡ እት ዮም 12 ዲሰምበር (እቦም አምዕል ዕምሰነ) እጃዘት ትትህየቦም። ሲዕ ወሬሕ እንዴ ዐለበው ጅነ ወልደው ምን ገብኡ፡ ሕኩመት እት ወልደዉ ጅነ ጃእዘት ዐባይ ተህይቦም።

አሜሪካ፡ ሕድገት ሰላዲ ቅረዲት ክል መጅተመዕ ኣጀትክ ዐጅቡቱ አውመ ነብራክ ረይሐቱ ምን ገብኡ፡ ቅረዲት ለሀይቡክ። እት አሜሪካ እት ክል መዋዐም ነብረ ሰኔት በልዐክ ምን ገብኡ እግለ ምባሸር አው ምባሸረት፡ እንዴ ነቀምካሆም ሰላዲ ቅረዲት (ቲፕ) ሂበት ላዝም ወዕንፍ እት እንቱ መጽእ ሀለ። ክም ዓደት ህዩ ምን ሰኒን ቅዱም ለምደወ።



ጅግረ ዱር አቅሊም ምግብ ትኤተነ



እት ክል ሐል እብ ፈደሬሽን ዐጀላት አቅሊም ምግብ እንዴ ትዝመ ለጉበእ ጅግረ ዱር አቅሊም ምግብ፡ ምን 17 አስክ 24 ኖቨምበር 2019 እግል ልግበእ ክም ቱ ፅላቃት ግም ናይሉ ፈደሬሽን ሸርሐ።

እትሊ እግል ሰቦ ሙራሕል ለልክተላሌ ጅግረ፡ አወላይት መርሐሉቱ ጅግረ ክሎሊት አስመራ፡ ካልይት መርሐሉት ናይ ፍረቅ ወወቅት ጅግረ፡ ሳልሳይት መርሐሉት አስመራ-ሕምብርቲ-መንደፈረ-አስመራ፡ ራብዓይት መርሐሉት፡ አስመራ-ሰጋደት መንግዳ-አስመራ-እምበይቶ-አስመራ-እምባትክለ-

አስመራ፡ ሓምሳይት መርሐሉት አስመራ-ድግሰ-አስመራ፡ ሳልሳይት መርሐሉት ናይ ብሕቶት ጅግረ ወቅት፡ ክምስልሁ መሳይት መርሐሉት እት አስመራ እብሉ ትጉበእ ጅግረ ክለት መዲነት እግል ለክክትም ቱ።

እትሊ ጅግራታት ዐጀላት ለሻርቲ መትጃግረት እብ ፍረቅ ክምስልሁ መርሐሉት ቶም። ክምስልሁ መትጃግረት ካርጅ ለልትጃግረ መትጃግረት ዐጀላት ምስሉ ሕበርበር ፍረቅ እግል ልክተው ክም ቀድሮ፡ ለፈደሬሽን ሕቡር ሀሉ።

እሊ ክእነ እት ሀሉ፡ መትጃግረት ማውንተይንባይክ አቅሊም ምግብ፡

እት ሐልፈተነ ሰንበት ንኢሽ 09 ኖቨምበር ሰልፋይ ናይ ሻምፕዮን አቅሊም-ምግብ ጅግረ እት ባክት ኤክስፖ ዋድያም ዐለው።

እሰልፍ ጅግረ ለእንበተው ዕምር 12-14 ሰነት ሸክል እት ጉበእ፡ ናይ 37.5 ኪሎሜተር ለልሄር መትጃግረት ሰፍ ጸብጠው። ፋትኤል ዮናስ እብ ብሕቶቱ ፅወት ናይ እሊ ጅግረ እሊ ጉበእ እት ሀሉ፡ ኤሌክሳንደር በረኽት።

ኤሰርም ኤፍሬም፡ ፍጹም ብርሃን፡ ዮቤል ዮናስ ወዮውሃንስ መድሃኔ (ሐምሲቶም ምን ፈሪቅ ጽንዓት) ምን 2ይ-አስክ 6ይ ፈግረው እቱ። መትጃግረት ዐጀላት ላትን አንሳት እት ወደያሁ ጅግረ ህይ፡ ሳርን ተኽሌ አወላይት እት ፈግር፡ ሮምና ጉዕሽ፡ ትዕግስቲ ፍሰሃይ፡ ቤትኤል እስቲፋኖስ ወዳናይት ረዘኔ ኩለን ምን ፈሪቅ ዐራግ አስክ ሓምሳይ ተርቲብ አብሀዘዩ። ቅሳነት

ክፍሉም ምን ጋላነፍሒ ህይ ደርበን ሳድሳይት ፈግረት።

ዕምር 17 ሰነት ወምለዐሉ ለወደዉ ጅግረ 52.5 ኪሎምትር ለሸምለ እት ጉበእ፡ መትጃግረታይ ፈሪቅ ናትና ፋሲል ተስፋልደት ተወወተ ዲቡ። ደርቡ ለክተው ህይ፡ ወድ ፈሪቁ አንጀሎ ጉበሪኤል ካልኣይ፡ 3ይ ሐበን ዑቕባሚካኤል፡ 4ይ ዮናታን ንፍታሌም፡ 5ይ ሴም ተኽሊት ሰልሲቶም እብ ብሕቶት፡ ክምስልሁ መ 6ይ ተስፋ ቱድርስ ናይሉ መርሐሉት ሰርገል ጃቀፈው።

ሊግ ዐንሰበ ልተላሌ

ሊግ ዐንሰበ ለሐልፈ ሰነት ትልህያታቱ አተላሉ። እት ፍረቅ ሐጋት ወአስሙድ ለትዋጅሁው እት ወሐጋት ለሐሰ ትልህያ ለአርአው ዲበ ጅግረ፡ ቀደም ዕርፍ እብ ጀማል ሰዒድ አሮት ጎል፡ ሐቆ ዕርፍ ህይ እብ ሙሰጠፈ ያሲን ክልኦት ጎል ለወሰከ ሐጋት 3፡0 ቀልቡ።

ለተሌት ትልህያ ፍንጌ ፍረቅ ህላል ወሳሕል ዐለት። አልሳሕል እበ እት ደንጎበ ደቃይቅ ሐበን መሐመድ ለኣተዩ እሉም ጎል 1-0 ቀልቡው። ክልኢቱ ፍረቅ ሐሊቱ አክል-ሕድ ምንመ ትመስል፡ ትልህያ

ደግሸ ትትረኤ ሰበት ዐለት፡ አልህላል ክልኦት መተልሂቱ እብ ከርት ቀይሕ ትጠረዘው ምኑ ከትልህያሁ እብ ናቅሳም መተልህየት እግል ለኣተላሌ ትጀበረ።

ሰንበት ዐባይ ህይ አልነሰር ምስሉ ሐዋኒት ሐረከት ለአርኤ ለሀሉ ፈሪቅ ስቲል ትጃገረ፡ እትሉ ትልህያ መተልህያይ አልነሰር ዐብደልቀኒ ዐሊ ሃትሪክ ሰለሰ-ጎል ረክብ እት ሀሉ፡ ዐሰማን ዐመር ጎል ሰበት ወሰከ፡ ትልህያ 4-0 እብ ዐውቱ አልነሰር ተመት። ትልህያ ደንደን ወሰሳሌ ክምለ

መትፈርጀት ልታክዋ ቱ ለዐለው ሕፍን መጃግረት ትረኤት ዲቡ፡ ትልህያ ምን ሰልፈ ሕፍን ምንመ ዐለት፡ ቀደም ዕርፍ ላት ጎል ኢትረከቡ።

ሐቆ ዕርፍ ደንደን እብ መአይደቶም እት ለሐፍኖ ሰበት ጌሰው እብ ኤፍሬም ዘርኦም እት 60 ደቂቀት ወእብ ዳዊት ክብርም እት 64 ደቂቀት ክልኦት ጎል ረክበው ወትልህያ ዝያደት ሃባተ ለምበ ትከዐ ዲቡ። እት 71 ደቂቀት ሳሳሌ ጎል ረክበው ወእብሊ ትልህያ 2-1 እብ ዐውቱ ደንደን አክተመት።



ማንሲቲ ሊቨርፑል ሐላዩ መበክቱ ከልኣዩ?

ሀረሚት ፕሪመርሊግ ላቶም ፍረቅ ሊቨርፑል ወማንቼስተር ሲቲ፡ “ሚ ዶል ጉበእ ልትራከቦ?” ልብሎ ወልታከው ለዐለው መትፈርጀት ለሐልፈት ሰንበት ዐባይ፡ ጽምኦም ረዌት እሉም።

ክልኢቱ ፍረቅ እት ሚዳን ማንሲቲ ትዋጅሁው። ማንሲቲ ቀደም መአይደቱ፡ ህይን ይወሉ። ማኖ ሰልፍ ራክብ ዲብ እንቱ፡ እብ ሐከም ትከለኣዩ። ኩረት ምን ማኖ እት ተዐንበልብል ዲብ አፍያት ማንቼስተር ሲቲ እት ተዐንበልብል፡ ፋቢኖ እት 6 ደቂቀት ምን እንበተት ትልህያ እጥ ሸግዲቶም ወሸቀዩ እሉም። ሐቆሃመ እት 13 ደቂቀት መሐመድ ሰላሕ እብ ረኣሱ ካልኣይ ጎል ደግመዮም።

ትልህያ እግል ዕርፍ 2፡0 እብ ሚርሐት ሊቨርፑል ፈግረት። ሐቆ ዕርፍ ገሌ ተቅዩራት እግል ንርኤ መስኢት ምንመ ዐሉ፡ አጉዌር ወረሒም ሰተርሊን ሐድ

ክወር ኢጃረበው፡ ምናተ እግል ከደኑ ሌጠ ጉበእ። ማኔ ዲብ 53 ደቂቀት ሳልሳይ ጎል ሊቨርፑል ሰጀሉ፡ 3-0፡ ሰኣዮት ለትአበትክ ትልህያ እግል ማንቼስተር-ሲቲ! ምልክዮት ኩረት እብ 55% ምስሉም ለዐለት ማንቼስተር-ሲቲ እት 79 ደቂቀት አሮት ጎል እብ ቤርናንዶ ሲልቫ ረክበው፡ ምናተ ሰበት ኢወሰከው፡ ለትልህያ 3፡1 ሊቨርፑል ተወወተው እቡ። ለእመር ሀዳፍ ማንቼስተር-ሲቲ አጉዌር ለጀሬት እቱ ከንዶኤ ደለ እለ ሾተ እግል ከደን፡ ወደለ ጌሰቱ ኩረት፡ ክምለ ኢሰኢሀ በረጌዕ ጉበእ ምን አምሱ፡ አክራቱ ህይ እብ በዱል ፈግረ።

ትልህያ ለእቡ ሐፍነት ሰብብ ዐለ እግሉ፡ ሊቨርፑል ማንቼስተር ሲቲ ለትደቀበ ፈሪቅ ሐቆ ቀልቡ፡ ምን አዜሁ እት ገጹ ለበዋር ሰበት አለቡ፡ እት ሰነት 1990 ለነስኣዩ ወአስክ አዜ እግል 30 ሰነት እዴሁ ለኢክረ ዲቡ ካሰ



ፕሪመርሊግ እግል ልንሰእ እት ሰኣዮት ጀላብ እግል ልሄርር ቱ። ልሰዕ 26 ትልህያ ታርፋቶም ለህለዩ ማንቼስተር ወሊቨርፑል፡

አዜመ ድቁብ ትልህያታት ልትጸበርም ሀሉ፡ ማንቼስተር እንዴ ኢልትቀለብ እተላለ ምን ጉበእ፡ ወሊቨርፑል ለልሀንእ ፍረቅ

ትረከበ ምን ጉበእ፡ ለእብ ፈርግ 9 ንቅጠት ምን ማንሲቲ እሲፋር ለሀሉ ሊቨርፑል፡ ለኢልትዐሬመ ኢልምሰል እትኩም!

ፍገሪት ፕሪመርሊግ እት 12ይት ሳምንት

እብ አሳስ ሰብረት ፕሪመርሊግ፡ ለድቁብ ፍረቅ ወደዩ ትልህያታት፡ በርንላይ እግል ዌስትሃም 3-0፡ ኒውካሰል እግል ቦርኒንግተም 2-0፡ ሌሴስተር እግል አርሰናል 2-0፡ ምልሽሰ እግል አስቶንሺለ 2-1፡ ማንቼስተር ዩናይትድ እግል ብራይቶን 3-1፡ ሊቨርፑል እግል ማንቼስተር-ሲቲ 3-1፡ ዋትፎርድ እግል ኖርዊች-ሲቲ 2-0፡ ቼልሲ እግል ክሪስታል-ፓላስ 2-0፡ ኤቨርቶን እግል ሳውዛምፕቶን 2-1፡ ቀለቡም እት ሀለው፡ ቶተንሃም ወሼፍ ዩናይትድ 1-1 ተዓደለው።

ሰብረት ፕሪመርሊግ ህይ ክእነ ትመስል ህሌት፦

1. ሊቨርፑል	= 34 ንቅጠት	11. ብራይተን	= 15 ንቅጠት
2. ሌሴስተር-ሲቲ	= 26 ንቅጠት	12. ክሪስ/ፓላስ	= 15 ንቅጠት
3. ቼልሲ	= 26 ንቅጠት	13. ኒውካሰል	= 15 ንቅጠት
4. ማንሲቲ	= 25 ንቅጠት	14. ቶተንሃም	= 14 ንቅጠት
5. ሼፍ-ዩናይትድ	= 17 ንቅጠት	15. ኤቨርተን	= 14 ንቅጠት
6. አርሰናል	= 17 ንቅጠት	16. ዌስትሃም	= 13 ንቅጠት
7. ማን-ዩናይትድ	= 16 ንቅጠት	17. አስተንሺላ	= 11 ንቅጠት
8. ምልሽሰ	= 16 ንቅጠት	18. ዋትፎርድ	= 8 ንቅጠት
9. ቦርኒንግተም	= 16 ንቅጠት	19. ሳውዛምፕቶን	= 8 ንቅጠት
10. ቦርንላይ	= 15 ንቅጠት	20. ኖርዊች-ሲቲ	= 7 ንቅጠት



ምፍጋር ጸሓይ አፍሪቃ፡ ኩሉ ካፊ አርዛቀ



አወላይት ሳምንት ወሬሽ ኖቨምበር መንጠቀት ምፍጋር ጸሓይ አፍሪቃ ደብኝ ሐርብ ወመትሐዋራር እንዴ ትገልጸዋል ምን ክም ማይ ወሐሊብ ለልሓብረ መቅሬሕ ሕብር ላባ ዐቦት እቅትሳድ ለትረክብ እቡ አግቡይ እቱ ሀድገት። ቀደም ለዋልየ መባድእ ዲቡ እንዴ አተፈቀት መርባየ ለአመርዴት እቱ እጅትመፅ ወዴት-23ይ እጅትመፅ ፍንጌ ሕክማት ወምኤምረት መፈወድየት እቅትሳድ ምፍጋር ጸሓይ አፍሪቃ። ለእጅትማፅ እብ መዓወነት ሕክማት ኤረትሪየ ወናይ መጅልስ ቅራን መፈወድየት እቅትሳድ ምፍጋር ጸሓይ አፍሪቃ

ሰላም ዛይድ ክምቱ ሸርሐ። ኤረትሪየ ተካምል መንጠቀትን እብ ክሉ ቀልብ ለትሐዝዮ ወለትሸቁ እቱ ክምቱ እንዴ ሸርሐ ምን መትደራራብ ተነዝማት እንዴ ነጌነ ለለደሚፅ ተጀመሮ ወዋቂ በራምጅ እግል ለሀሌ ክም ተአምን አከደ።

እት መጅልስ ቅራን ለዓሊት ሰክርቴረት መፈወድየት እቅትሳድ ምፍጋር ጸሓይ አፍሪቃ ሚስ ሼረ ሶንጉዌ እብ ጀሀተ። ድወል እለ መንጠቀት ፍንጌ ኖሰኖሰን እብ ክልቃሁ ናይ ተጃረት መትአሳሳር እግል መዋግኒን መሰተቅብል ባርህ ክም ክሰተ። እቅትሳድን እት አፍሪቃ



ምን 05-07 ኦክቶበር 2019 እት ሆቴል አስመራ ፓላስ ገብአ።

እት መክሰቲ ናይ እለ “አዋፊሕት ኡብኮት ሐዲስ እግል መቅሬሕ/ ተካምል መንጠቀት ምፍጋር ጸሓይ አፍሪቃ” “Leveraging new opportunities for regional integration in Eastern Africa” እት ሐንቴለ ልብል ሸዓር እግል ሰልፍ ኢነት ዲብ አስመራ ለገብአ እድንያይ እጅትመፅ፡ ወዘር ኻርጅየት ኤረትሪየ አሰይድ ዐሰማን ሳሌሕ ከሊመት አሰመፀ። አሰይድ ዐሰማን መንጠቀት ምፍጋር ጸሓይ አፍሪቃ እብ አዳመ ምን ገብእ ወአርዛቅ ጠቢቦተ መውሀብት ክምተ እንዴ ሸርሐ፡ ጊመት ሐርብ ሐቀ ትገልጸዋል ምኡ አርዛቅ እት ሰን መዋግኒን እግል ተአወሰሉ ወመቅረሕ እንዴ ሰነ እት አትካመሉት ሕድ እግል ትሸቂ ዶር

ወዐለም ሚዛኑ ለዐቅብ እት አርድየት ጣፍሐት ለትብነ እግል ልግበእ ክም ሰድሮን ሸርሐት። እለ 420,000,000 ሸቦብ ለነብረ፡ ሸባብ ወነአይሸ ለበዝሐ እት መንጠቀት እት ኖሰኖሰ ለሀሌት እለ ተጃረት የአፍሪካ ወኢትነፊዐት ምነ ምን ገብእ፡ ለክል ሐል ሸቅል እግል ትክለቅ እሎም ለልትጸበር 8.5 ሚልዮን ሸባብ ምራዶም እግል ተአትምም ወዐቦት ዳይመት እግል ተአክድ እሎም እግል ልሐሊ ክም ቀድሮ አፍሀመት።

እት መክተብ መፈወድየት እቅትሳድ አፍሪቃ ናይ መጅልስ ቅራን ናይ ዶሉ መሰኡል ላቱ ሚስተር አንድሩ ሞልድ ሆይ፡ እትለ መንጠቀት ተአሲር ለቡ ሕዱድ ለልትዐዴ መሻክል



እብለ እግሉ ተአስትህል ገበይ ሰራዩ እግል ልትረክብ ሀሌት እሉ ቤለ። ለመንጠቀት እቅትሳድ ምስለ ብዕድ መናዋቅ አፍሪቃ ዶል ልትቃረን እብ ሸዓግ ለዐቤ ምንመ ሀሌ፡ ለዐቦተ እት ሰን መዋግኒን ወክለቅ ሸቅል እግል ሸባብ፡ መጦር ገያደት ዐቦት እቅትሳድ ገይስ ክም ኢህለ አፍሀመ። እትለ ምን 2014 ወእንዜ ሰነትክ እብ 6.6% ተዐቤ ለጸንሐት ወእትለ ሰነት 2019 እብ 6.4% እግል ትዕቤ ትሰኢ ለሀሌት መንጠቀት፡ ክል ሰነት ሸቅል ለለሐዜ ሸባብ እብ መላዩን ወሰክ ወህተ ለትክልቅ ሸቅል ባኩም ለኢበጸሕ ጋብእ ሰበት ሀሌ፡ ለዐቦት ሸክለ ለጸብጠት ዳዋም ለበ ለበዝሐ ገቢል ለተአረቤሕ እግል ትግበእ መቅሬሕ ወተካምል እለን ድወል ለአትሐዜ። ተካምል ሆይ ኖሰኖሰን እብ ተጃረት ምን ልትአሰራ፡ ክድመት ወዕልም እግል ሕድ ምን ለሀይብ ወነሰአ ሌጠ ክም ልትአከድ ተሃገ።

መመቅረሓይት መአሰሳት መጅልስ ቅራን ዲብ ኤረትሪየ ሚስ ሱዛን ንጎንጊ ሆይ፡ ኤረትሪየ እለ አቅሊም መቅርሐ እንዴ ሰነ እግል ልትካመል ንዩተ ክምቱ እብ እለ ነሰአት መባደረት መትሐዳርለ እጅትመፅ እርኢተ ክም ሀሌት እንዴ ሸርሐት፡ ለአተ እጅትመፅ ትሀደገ ቅደይ እቅትሳድ፡ ተፋህም እጅትማዕየት፡ ሰዶሐት፡

እት ተካምል እቅትሳድ ወረሀየት ናይለ መንጠቀት ለተሀሌ እሉ ግዴት ዐባይ ወሰፈት።

ለእጅትመፅ ለትፈናተ ተካምል ወመቅሬሕ መንጠቀት ለኸሰሰ ክም ሰዶሐት፡ እቅትሳድ ሊኒ (ማይ አብሐር፡ መራታት ወመሓዛት ሰኒ እንዴ ተሐፊዝ ከፎ እት መሰለሐት ገባይል ልውዕል ለልርኤ)፡ ኡብኮት ሸቅል ወተጃረት ፍንጌ አፍሪቃ ኖሰ፡ ተፋህም እጅትማዒ ፍንጌ ገባይል ለመንጠቀት . . . ለኸሰሰ ናይ ሕፍዝ ውራቅ እቱ ናቀሸ። እት ደንጎቤ ዝያድ 30 ንቃዋ ለክምክም መርባይ ውራት ተካምል መንጠቀትን ለመሬሕ “ሸፊሕ አስመራ” (Asmara Communiqué) እቡ ፈግረ። ሸፊሕ አስመራ፡ ሕክማት ኤረትሪየ 23ይ እጅትመፅ ፍንጌ ሕክማት ወሰብ መቅደረት ናይ መፈወድየት እቅትሳድ ምፍጋር ጸሓይ አፍሪቃ መትሐደርተ እንዴ ሐመድ፡ ኤረትሪየ ሰነት 2019 አሰክ 2020 መክተብለ መፈወድየት በዐል መንበር እንዴ ገአት እግል ትምረሕ እብ ዕመማይ ውፋቅ ለእጅትመፅ ክም ትቀረረ አትአመረ።

እት ካቲመ ናይለ እጅትመፅ ምን ውሃረት ኻርጅየት ሰፊር ተሰፋሚነኤል ገራህቱ ዲብለ አስመዐየ ከሊመት፡ ምፍጋር ጸሓይ አፍሪቃ ወልወል ሰላም ለሄርየ ክም ሀለ ወንዩተ እግል አዳባር ወጠንዩት ወናይ ሕብር ዐቦት ወተካምል ፍትሕት ክም ሀሌት እትለ እጅትመፅ ክም ትብዩን እንዴ ሸርሐ፡ ኤረትሪየ ምስል መፈወድየት እቅትሳድ ምፍጋር ጸሓይ አፍሪቃ እት አደቃብ ጣቀት ወዐማር ማይ ክም ትከድም አከደ።

እተ እጅትመፅ ሓድረት ለዐለት ወዘረት ሰዶሐት ፈደረላይት



ድሞቅራጥያይት ጀምሁርየት ኢትዮጵያ አሰይደ ሂሩት ካሳሁን እግል እብ ሰብብ አከይ-መቅሬሕ እት ብዙሕ መጃላት እብ ዓመት እት ዐቦት ሰዶሐት ሆይ እብ ፍንቱይ ለትክሰረ ኡብኮት እግል ልክሐስ ለቀድር እት ወክዱ ለመጽኦ እጅትመፅ፡ ቴሎ።

መሸተርከት እት ዮም ሰቡዕ

ሐርስ ወበሐር ለለትአምር በራምጅመ ንዙም ዐለ። ክምሰልሁመ ኤረትሪየ እግል እስትቅላለ ለሓለፈተ ክርብት ወለደፍዐቶ እስትሸሃድ ቃሊ፡ ዓዳት ወመንበር ቅምያትን ለለትአምር ፍልም ትቀደመ። ፍርቀት ዓዳት ሰብሪትመ እግል ጋሽ እት ገአት ዐዘመት ድራር ልብሰት ወሰሰዒት



ኖቨምበር ምን ገጽ ፈጅር አሰክ አቅሊም ግብለት እንዴ አተጀሀው ማይ እግል ልትሐፊዝ ኤረትሪየ እብ መቅደረት ኖሰ ትወድዩ ለሀሌት ለለርኤ ከዛናት ለጎ ወገርገረ፡ እብ ጣቀት ጸሓይ ልትዐመር ለሀለ ሐርሱ፡ ሐሊብ እግል ልትወጀድ ገብእ ለሀለ ጅሀድ ለለርኤ መሻፈዕ በጽሐው። እብ ምኤምረት ሆይ ሐብሬ ተሀየበው። እት ኤረትሪየ እግል ዳይመት ክድመት እጅትማዕየት እብ መቅደረት ሰብ ኖሰ ለትአሰሰ መሻፈዕ እብ ዕንቶም ምን ረአው፡ እብ ኸሰሰ ለጸንሐ እሎም ፈሀም እግል ልፍየሕ ክም ሰደዮም ሸርሐው።

ዲብ እለ ኤረትሪየ ለተሐደረቶ እብ መክተብ መፈወድየት እቅትሳድ አፍሪቃ ናይ መጅልስ ቅራን ለትዝመ እድንያይ እጅትመፅ፡ መተቅብለት ለበሰጠት ሕድርኖት፡ አትአማር ምስል ወካይል ሰፈርያት ወርዝቅ ሰዶሐት፡

ኤረትሪየ አርኤት።

ለርሐ ከፊ ወጸሩ አርዛቅ መንጠቀትን ሰልፍ ኖሰነ እንዴ ሰኔነ እቡ እት ጸርነ እግል ልዕዴ ለሰዴ ሸፊሕ ረሰሚ እቡ ለአክተመ እጅትመፅ፡ ኤረትሪየ፡ ኢትዮጵያ፡ ጅቡቲ፡ ሶማሊያ፡ ግብለት ሱዳን፡ ብሩንዲ፡ ሩዋንዲ፡ ኬንያ፡ ዲሞቅራጥያይት ጅምሆርየት ኮንጎ፡ ኡጋንዳ፡ ታንዛንያ፡ ኮሞሮስ፡ ማደጋስካር ወሰሸልስ ሻረከየ እቱ።

